

Jesu Adioukrou

ec'Amani Mamn eke nɔn
Ów ek'it eke wɛl k'uw any

Mark elm Jesu eci *jam esel lew yony ab em ec'egɲ. Ob Kok e lel ab em a, wɛl b'esɲ'n Jan Mark. Li kok juma *erm esel ek'el Pɔl lele Pier ab (Ob Kok 12.12; 13.413; 1 Pier 5.13). Jesu eci lís e low eke l'iri Pier dad a anake ni nɔn a.

Mark am yegm ey eke Jesu el Nyam ec'Iy eke Nyam erur tasi. Eke Jesu ɔb juma kok nuɲ a, l'erurm eke wɛl k'uwr any fafa ese *Mesi af, ese eb ebu af, aɲke l'erur eke usu k'irm es ke l'ótu li yegm in e jam esel a low. Ow it eke li k'otar akr li yegm wɛl eb ebu yec'eke l'el a. Na sosiem anake l'edɲn agɲ a eke l'ewlm a eke ki dad in e low ok agɲ ejec'a (Mark 1.34,44; 3.12; 5.43; 7.3637; 8.26,30; 9.9). Eke dedeku a iri eke l'el Mesi a, ow ibnm etɲ Jwifel eci nuɲ af esel a ibi'r nyamn eyr eke n'ɔnɲn ow ec'a sosiem.

Mark nɔn Amani Mamn na agɲ a ek'elm Jwifel a eci. Lɛgɲ sig em a, l'igɲ sisekp nuɲ, kɔ yefenyina em a, l'ub Jesu nawre, etɲ wɛl am ijr el gbɛ ɔmn eke n'ɔnɲn a sosiem. Mark am nɔn lel na atr el sos es yec'etɲ ke n'ɔnɲ ɔmn Jesu eci abusu a eke ɔny ab em. N'am elu ɔkm li yegm Jesu eci lɛc eke ij akm *abɲ enuɲ a e low. N'am elu ɔkm li dad eke Jesu in b'ewlm ɔl fɛɲ, ow'n ɔny abusu eke ow'n ki kok sakrowa. N'am yegm wɛl yej'eke Jesu eci jam us a in elm akrowa owi cɛ, aɲke Jesu in ɛkn gbɛ lele luw ab. Eke l'ɔkn eke Jesu igb luw em, in eci gbɛ ij a ɔtu eke k'atr el sos es n'inym es kikri el eci gbɛ ij em.

1

Jan mij ok nuɲ es e Nyam odad eke dad

Matie 3.112; Luk 3.118; Jan 1.1928

1 Aɲa anake Jesu *Krist [Nyam Jim] ec'Amani Mamn a ɔb nuɲ a,
 2 ese elel eke Nyam eci *kokoba ɔb es Esayi nɔn ab af:
 Em Nyam, m'ow m'ɔɲ em ec'erm es ikɲ
 anym kok ɲ ec'ejagb a.

3 Egɲ nyam anɲ loj am elu lebl dad ese:
 «Kòkr Es Kɔtɔkɔ ec'ejagb a,
 kòkr in e sebr a ínym nyim nyim!»

4 Kin elel eke Jan mij ok nuɲ es ey ɔkm loj, ke am elu lebl dad: «Ítɲnin erm em, òkr mij nuɲ, ke Nyam b'ow oc ɔny e sikpl a ap ɔny.»

5 Jude wus a nimum ec'agɲ a fɛɲ lele Jerusalem ec'ab ab am ow Jan ogɲ. N'am egɲ el e sikpl a l'eb agɲ a fɛɲ ec'any af, etɲ Jan am ok el mij nuɲ Jurden erɲ.

6 Jan sus mob eke wɛl kok gbɛɲkɔ kedebnam e suw em, etɲ l'egɲ ndey lel em e meb er em. In ec'ob eke li b'ij a el tete gbɛɲgbɛn lele mow mun ab.

7 N'am dad agɲ a fɛɲ l'ese: «Egɲ a ek'anɲ'm jam b'ow a, ɔny abusu nɔnɔ akm im, m'itm yeji eke mi k'is es bake m'ɔny in e cɔkrupɔ meb a mi mɔmu es.

8 Em ec'a, m'am ok ɔny mij nuɲ mij em, kɔ in li b'ow l'ok ɔny mij nuɲ Abɲ Lala em.»

Jesu e mij ok nuñ lele ebm ekn owi ab

Matie 3.134.11; Luk 3.2122; 4.113

9 Lægñ ab em, Jesu anñ Nasaret Galile wus af ow, etñ Jan ok'r mij nuñ Jurden erñ.
 10 Eke n'anñ mij ab em n'am ey ðkm a, l'ekñ afr agbr em etñ Abñ us'r es nuñ af ese kel af.
 11 Etñ lebl nyam anñ afr ikñ am dad ese: «Iñ el em ec'Iy eke m'erur tasi; m'oc em eci sos em iññ feñ m'elu'ñ em.»

12 Kpekñ eke ow b'uwr a, Abñ Lala oc im'n loj.

13 N'anñ yogñ l'ij seğñ ekñ yony eke *Satan eju'r. L'ir yogñ akp em e mindey ab, etñ *afr erm esel ow am kok in e lís e low.

Jesu e jam esel krekre ek'esñ

Matie 4.1222; Luk 4.1415; 5.111

14 Lægñ ab em eke wél elu Jan mij ok nuñ es sobel em a, Jesu im Galile wus af etñ n'am ðb Nyam ec'Amani Mamn a eci kokoba li dad l'ese:

15 «Lægñ a eke Nyam ewar a ow ñ, anke Nyam ec'*es ew a ow titm. Ìtñnin erm em ke ébr Amani Mamn a.»

16 Eke Jesu am ecr Galile eci mij lekpl a e saw saw a, l'ekñ ðcn ibi esel agñ yony, Simo lele lisijim Andre ab ek'am ok muw mij lekpl ab em.

17 Jesu dad el nine: «Ûsr'm jam, m'ow mi kok ðny éel agñ eb esel.»

18 Kpekñ li digñ el e muw a l'ok es, etñ l'us ow jam.

19 Jesu b'imn anym eci tel a, l'ekñ Sebede jimel a, Jak lele lisijim Jan ab. N'anñ el eci mijetñ ab em n'am kok el eci muw a.

20 Kpekñ Jesu esñ el; li digñ el es Sebede lele el e juma kok esel ab ab l'elu es letñ ab em, etñ l'us ow jam.

Jesu ewlm abñ ñuñ es a

Luk 4.3137

21 Jesu lel in e *jam esel ab ab im Kapernayum ec'eb ab em. *Neneğñ e læğñ a, Jesu ey *Nyam nuñ iğñ usu a etñ am yeğm agñ low.

22 Agñ a ek'am iri in e low yeğm a, low am iti any in ec'el el eke n'am yeğm agñ low a sosiem, anke n'anm ese el ec'ol e *low yeğm esel ab af, kò n'am yeğm wél low abusu ðny em.

23 Ke Nyam nuñ iğñ usu yogñ eğñ nyam ek'*abñ ñuñ anñ em a, am ðg dad ese:

24 «Oy! Nasaret e Jesu, bla am erur eke ki kok ey ee? Kò ek'ow eke ki ñuññ ey ee? Em, m'uw eğñ ek'el'ñ ab any: Nyam ec'erm es lala.»

25 Jesu dad abñ ñuñ a odad lebl tuotuo em nine: «Yèwal, ke éy ðkm eğñ na em!»

26 Abñ ñuñ a mumu eğñ a lec em, etñ am ðg ey ðkm in em.

27 Agñ a feñ low iti any afññ es toñ batñ n'am bibrmnin el ðfr l'ese: «Kò na bla lowi ana ee? Bogñ ec'abusu ðny em e low yeğm owr ana ee? Eğñ ikñ na ew *abñ erññ yej'es, etñ li b'elum ow!»

28 Etñ kpekñ agñ am dad Jesu e lís e low Galile wus nimum af.

Jesu ewlm ólu nòno

Matie 8.1417; Luk 4.3841

29 Eke n'anḡn *Nyam nuḡ igḡ usu a l'okr ɔkm a, Jesu, Jak lele Jan ab im Simɔ lele lisijim Andre ab ogḡ a.

30 Simɔ ey lis eke sos am etu es a, eru es. Etḡ kpekḡ wɛl dad in ec'ɔl owi ok Jesu.

31 Jesu im eḡn yɔw a, l'ucu abu n'ɔny l'igbm ow, etḡ kpekḡ in ec'ɔl a oc'r es lís. Etḡ yɔw a am kok el e lís e low.

32 Ncebles em a, eke ligbn im eru es a, agḡ ot el ec'ɔlu a feḡ is Jesu; *abḡ eḡuḡ esel yeji anḡ em.

33 Eb ab em ec'agḡ a feḡ as luku Simɔ eci lisany a.

34 Jesu ewlm ɔlu a lel el ec'ɔl eḡn eḡn a feḡ ab. N'am ogḡ abḡ eḡuḡ a, etḡ l'élum wɛl abusu es eke wɛl ki dad odad, aḡke l'uw eḡn a ek'el Jesu ab any.

Jesu am ḡgboḡ Kapernayum

Luk 4.4244

35 Lɛḡḡ eny ow em a, eke usu k'otm es a, Jesu igb ey gberḡ etḡ im usu saw em. Yogḡ, n'am ḡḡḡn Nyam.

36 Simɔ lele lawlɛl a ek'anḡ in ab ab ok ɔkm im in ec'ɔl em.

37 Eke n'eḡan ow a, li dad ow nine: «Agḡ a feḡ am ɔl'ḡ.»

38 Jesu dad el nine: «S'ḡgboḡn aḡa, s'ímn baḡn saw saw a, aḡke yogḡ yeji ow it eke mi ki dad el Amani Mamn a ec'odad. Na sosiem eci m'ow wus na af.»

39 Etḡ Jesu am ec Galile wus ab af nimum. N'am ɔb Amani Mamn a e kokoba *Nyam nuḡ igḡ usu a feḡ, etḡ n'am ogḡ *abḡ eḡuḡ yeji.

Jesu ewlm kokobe es nyam

Matie 8.14; Luk 5.1216

40 Lɛḡḡ nyam *kokobe es nyam ow am kok ɔḡḡ ibrm Jesu abu elum; l'ok ɔwɔkp wus Jesu ec'any af, etḡ n'am dad l'esɛ: «Eke ḡ erur, ɔtu eke k'*ayal'm.»

41 In e low ɔny Jesu ɔḡḡ; l'eḡḡm abu es l'itḡn ow etḡ li dad nine: «M'erur, ày!!»

42 Kpekḡ kokobe a oc'r es lís, etḡ l'ayl.

43 Jesu elu ɔlu a eke l'ewlm a abusu es eke k'im, etḡ l'ewar ow lebl tuɔtuɔ em nine:

44 «Ìri senyn senyn, kɔ dad low na k'ok eḡn kaka! Gbekɔ ìm yeḡm *egb waw es a sos, ke wáw egb esɛ elɛl eke Mois ec'ol a ibrm ab af, ke ow íj danḡu.»

45 ɔlu a im, etḡ usu a feḡ n'am dad low a eke eḡn'n a ec'odad. Na sosiem Jesu ɔtum ilam sos any eb em, kɔ li b'anḡ usu saw em ke agḡ am anḡ susu a feḡ ow in ogḡ.

2

Jesu ewlm sos es wɛw es nyam

Matie 9.18; Luk 5.1726

1 Eke sɛḡḡ beb ec a, Jesu ewl ow Kapernayum, etḡ dedeku a iri eke l'ec akḡ.

2 Etḡ kpekḡ agḡ nɔnɔ ow as luku gbugḡ a eb usu a feḡ; usu kaka anm, lisany a bɔbɔ yeji usu anm. N'am dad wɛl Nyam ec'odad,

3 etḡ agḡ yar abu sos es wɛw es nyam am is Jesu.

4 Gbekɔ eke li k'ɔtum l'okmn yogḡ a eke Jesu sig es agḡ a sosiem a, li fig usu nyam èl luw af a, etḡ l'oc

ɔlu a ek'anŋ in eci faja ɛm a l'usm es Jesu ec'any af.

5 Eke Jesu b'ekn agŋ a ec'omn a, li dad sos es wew ɛs a nine: «Ɛm jim, m'oc ŋ e sikpl a m'ap'ŋ.»

6 Ol eci *low any uw ɛsɛl bɛb sig es yogŋ, ɛtŋ am tutr ɛl ec'erm ɛm dad ɛsɛ:

7 «Kɔ bla ɛtŋ ɛgŋ na am dad odad nɛnɛ ee? N'am ɔbr Nyam any! Bwo ec'ɛgŋ ɔtu eke k'óc sikpl ap ek'ow elm Nyam ɔny coco ee?»

8 Eke Jesu uw ɛl e sow tutr ab any a, li dad wɛl nine: «Kɔ bla ɛtŋ am tutar ów amua na ɔny ec'erm ɛm ee?»

9 Kɔ bogŋ ec'anake ɛw fuɛfuɛ eke wɛl ki dad sos es wew ɛs ab ee? «M'oc ŋ e sikpl a m'ap'ŋ», oglog ke wɛl dád'r ɛsɛ: ðgb oc ŋ eci faja a ke án es ee?»

10 Gbɛkɔ m'erur eke k'uwr low na any: wus na af, ɛgŋ ec'*Iy ɔny abusu eke k'oc sikpl ap.» Ɛtŋ sica li dad sos es wew ɛs a nine:

11 «M'am dad'ŋ, ðgb oc ŋ eci faja a eb ejagb ím gbugŋ!»

12 Kpɛkŋ ɛgŋ a igb agŋ a fɛŋ ec'any af, l'oc in eci faja a, ɛtŋ l'ɛy ɔkm n'am an es n'im. Ow e low a iti dedeku ab any, ɛtŋ n'am kɔklm Nyam li dad l'ɛsɛ: «Lɛgŋ kaka s'eknm low akpasu na.»

Jesu ɛsŋ Levi eke k'us'r jam

Matie 9.913; Luk 5.2732

13 Ɛmeny Jesu ɛwl im Galile eci mij neny a. Agŋ nɔnɔ am ow in ogŋ, ɛtŋ n'am yɛgm wɛl low.

14 In ec'ɛc ɛm a, l'ekn Alfe jim Levi, eke sig es wus labm eb usu. Jesu dad'r nine: «Ûs'm jam!» Levi igb ɛtŋ us'r jam.

15 Ow e jam a, Jesu im Levi ec'akŋ a, ɛtŋ am ij ob. *Wus labm eb ɛsɛl nɔnɔ lele *sikpl ɛsɛl ab am ij ob Jesu lele in eci *jam ɛsɛl ab ab, aŋke agŋ amua e nɔnɔ anake am us'r jam a.

16 Ɛtŋ ol e *low yɛgm ɛsɛl ek'el *Farisiel ec'ogog ec'agŋ a, ɛkn eke Jesu am ij ob agŋ amua fɛŋ ab; ɛtŋ li dad in eci jam ɛsɛl a nine: «Kɔ bla ɛtŋ n'am ij ob wus labm eb ɛsɛl amua lele sikpl ɛsɛl amua ab ee?»

17 Jesu iri odad a eke n'am dad a, ɛtŋ dad ɛl nine: «Agŋ a ek'anŋ sos tuɔtuɔ ɛm a, íbram sos kok ɛs, kɔ ɔlu anake b'íbrm sos kok ɛs a. M'owm eke mi k'ɛsŋ agŋ eke b'ubr ɛl sosi nɛnyɛmbri nyam ɛsɛl a, kɔ m'ow eke mi k'ɛsŋ «sikpl ɛsɛl.»

Ob owr lele ob sig ab ókrm af

Matie 9.1417; Luk 5.3339

18 Lɛgŋ nyam, Jan mij ok nuŋ ɛs eci *jam ɛsɛl a lele *Farisiel ab am *ɛnŋ neny. Agŋ ow am íbrm Jesu ɛsɛ: «Kɔ bla sosiem ɛtŋ Jan mij ok nuŋ ɛs eci jam ɛsɛl a lele Farisiel ec'ab ab b'*ɛnŋ neny ɛtŋ ŋ e jam ɛsɛl a ɛnŋm neny ee?»

19 Jesu dad ɛl nine: «Kɔ am tutar ek'agŋ lawlɛl eke wɛl ɛsŋ mɛbi eci es gbɛgbl ɛm a ɔtu eke k'ɛnŋ neny eke yɔw ɛc a anŋ ɛl ab ee? Njan! Sɛgŋ a fɛŋ eke yɔw ɛc a b'ow anŋ ɛl ab a, li b'ow l'ij ɛtŋ li b'ow l'ɛgŋ.

20 Gbɛkɔ lɛgŋ am ow eke wɛl b'ow ɔny yɔw ɛc a oc ɛs ɛl ec'araŋŋ, ke sica n'ɛnŋ neny gɔŋ.»

21 Ɛtŋ Jesu ub ɛl nyandre nine: «Ɛgŋ ócm gbad owr lele gbad sig ab ɔbarm gigŋm. Eke kok ɛben, ke gbad owr a b'ow ɔny gbad sig a agbr ɛm; ɛtŋ gbad a ec'ɛm agbr a b'ow agb nɔnɔ.

22 Ɛtŋ emeny ɛgŋ ócm mar owr okm marel sig ɛm. Eke kok ɛben a, mar owr a b'ow inŋ toŋ ba ke ɔny marel sig a ɔb ɛs. Ɛtŋ wɛl b'ow irmn mar a lele marel ab ab. Tasi ɛm a, mar owr, marel owr ɛm wɛl k'ok.»

13 Ca Jesu uyu lafeny af, l'esh agn eke l'erur a etj wel ow in ogn.

14 El em a li sɔsum agn lew yony l'ot [etj n'ɔn wel nin *erm esel]. Li sɔsum l'ot wel eke wel k'anj in ab ke n'am erm wel n'im l'ɔb *gbrengbi usu a e kokoba.

15 N'ɔn wel abusu eke wel k'ogn *abj enj yaji.

16 Kin erm esel lew yony a ec'en: Simɔ (Jesu ign'n nin af Pier),

17 Jak lele lisijim Jan ab, el Sebede ec'ey (Jesu ɔn el nin Bwanerges ek'el nyandre em: «agn ek'el e low kok b'ot nyambrany es»),

18 Andre, Filip, Bartelemi, Matie, Toma, Jak Alfe jim, Tade, Simɔ low doghn es,

19 lele Judas Iskariot ek'ɔl Jesu ij ab ab.

Wel am cicr Jesu eke n'ɔny agn ec'abj

Matie 12.2232; Luk 11.1423; 12.10

20 Emeny Jesu ewl meny ow akj a. Agn nɔnɔ ewl meny ow as luku yogj ton Jesu lel in e *jam esel ab ab ennm abusu eke k'ij ob yeji.

21 Jesu ec'akj ec'agn am ow eke k'oc'r ab im anke n'am iri eke Jesu in ki kokm egj em owi.

22 Etj ol e *low yegm esel ek'anj Jerusalem ow a am dad ese: «*Belsebul, *abj enj ec'es ew a, anj Jesu em! Ow anake ow b'ɔn'n abusu ke li b'ɔtu l'ogn abj enj a.»

23 Jesu esj el etj n'am dad wel sodad nyandre em l'ese: «Ayaf *Satan ɔtu eke k'ogn in sosi ar ee?

24 Eke batj es ew nyam ec'agn b'ogn ar el ɔfr em, es ew a k'ɔtum anm ij.

25 Eɓen nenyembri nyam bosu nyam ec'agn ek'ubr em el ɔfr a, k'ɔtum anm ij.

26 Eke batj Satan b'ogn in sosi ar, oglog Satan neny ókrm af in obi ab ij a, ke in eci abusu a k'ɔtum ibnm ij; in eci es ew a uwr ŋ.

27 Etj emeny, eke wel erur eke k'im ey lec es nyam ec'akj iy'r mil a, ow it ke wel íkj anym ɔny awj'n gbuj ke wel ɔtu ey in ec'akj a ot in eci mob a fej.»

28 Etj Jesu ign af dad nine: «M'am dad ɔny nawre em tasi, agn ɔtu eke k'ejn sikpl fej lele sodad enj fej eke li b'ow li dad l'ok Nyam af ab ab ec'oc ap.

29 Gbɛkɔ ek'egj nyam dad low njj ok Abj Lala af a, li k'ow n'ejnm ow ec'oc ap legj kaka, anke low njj a b'ow anj'n af segej fej.»

30 Jesu dad odad na ok ol e low yegm esel ab af, anke li dad ek'abj njj in anj ow em sosome.

Jesu lis lele lisijimel ab

Matie 12.4650; Luk 8.1921

31 Etj Jesu lis lele lisijim jam esel ab ab ow. N'inym es gbenj a etj n'ɔn egj ey akj a eke k'esh'n.

32 Agn nɔnɔ ok es iwr elul Jesu em, etj wel dad'r eke: «Kin, esj lele esj jimel ab ek'ow inym es gbenj a. N'am erur eke li k'ekn'j.»

33 Etj Jesu dad nine: «Kɔ bwo el em lis ee? Etj kɔ bwo el el em lisijimel ee?»

34 Etj eke l'ew nyamn li ler agj a ek'ok es iwr did elul il em a, li dad nine: «Kin em lis lel em lisijimel ab ek'anj anj,

35 anke egj kaka fej eke bi kok Nyam ec'erur a, el em lisijim, em lisijɔw, lel em lis ab.»

Matie 13.19; Luk 8.48

- 1 Sakp ejeci, Jesu ow Galile eci mij neny a, etj n'am yegm agj low. Agj nɔnɔ ow ar did elul il em. Na sosiem l'ey mijetj nyam ek'anj mij af ab em etj li sig es. Bieku a nimum ok es mij neny a.
- 2 Jesu am ot nyandre em ec'ow nɔnɔ yegmn el low. In eci low yegm ab em, n'am dad l'ese:
- 3 «İgjn lɔru es irir! Lɛgɔ nyam, egb ewl es nyam im ɔgm am ewl egb.
- 4 Eke n'am ufj egb ey ab es a, beb ok ebr af etj ɔr ow sus ij.
- 5 Beb ok mebn wus af, usu eke sec enym. Kpekj l'eli sec a ek'enym a sosiem.
- 6 Kɔ eke ligbn ow afr a, l'ebal egb a eke eli ok ɔkm a etj li wewr ow es anke min ɔnym el wus tasi.
- 7 Beb ejeci ok usu eke mirj anj. Mirj a eli ɔny awj el es. Na sosiem l'ɔsum ey kaka.
- 8 Gbekɔ egb ey a e beb ok wus mamn af. L'eli l'ok ɔkm, l'agb etj l'ɔsu ey. Beb ɔsu likj lele lew ab, beb ec'a ekj nyahan etj ow e beb a ɔsu ekj yen.»
- 9 Etj Jesu igj af dad nine: «Ek'ɔnyɔn ɔru eke k'irir, ke írir senyn senyn!»

Low sosiem eke Jesu b'oc nyandre odad yegmn agj low

Matie 13.1017; Luk 8.910

- 10 Eke Jesu anm bieku ab ab ij a, in e *jam esel lew yony a lel agj a eke b'anj in ab a, am ibrm'n low sodad nyandre ab af.
- 11 Jesu dad el nine: «ɔny ɛjan Nyam eci *gbrengbi usu a ec'ow a eke lɔl es a ec'any uw. Kɔ el ec'a, nyandre em ce m'am dad el,
- 12 yec'etj ke
- li bi ler ke li k'eknmn;
- li b'iri ke ow k'okm el es sos em,
- anke blel ow am ok el es sos em,
- blel l'ewl meny l'ow Nyam ogj,
- ke blel ow ap el low.»

Wus akpasu yar a ec'akr otar

Matie 13.1823; Luk 8.1115

- 13 Etj Jesu dad agj a ek'anj yogj a nine: «ɔny ɔtumn irimn egb ewl es a ec'odad a e nyandre? Ayaf b'ow ɔtur irir sodad nyandre em a fej ee?
- 14 Egb ewl es a ewl Nyam odad.
- 15 Ebr ab af a eke egb a ok a, el agj eke b'iri odad a. Kpekj *Satan ow ɔny odad eke wɛl ewl el ec'erm em a oc es.
- 16 Mebn wus a eke egb a ok a, el agj eke b'iri odad a ke kpekj eb'r sos em ijn em.
- 17 Gbekɔ, li yebmn odad a okm min el em, li b'ew erm af tel ce. Eke sica sos es ɔw owi oglog gbre ij owi b'ow Nyam odad a sosiem a, li b'egbr ɔmn a fafa.
- 18 Wus a eke mirj nɔnɔ anj af ke egb a ok af a, el agj eke b'iri odad a.
- 19 Gbekɔ wus aja ec'erm mij ebr, ob ɔny e meju lele wus ec'ow aw ejeci nɔnɔ iy el erm em gbɔj, etj ɔny odad a awj es el em, ke ɔtum ɔsum ey kaka.
- 20 Wus mamn a el agj eke b'iri odad a ke eb'r. Ow ɔsu ey el em. Beb ɔsu likj lele lew ab, likpr ɔsu ekj nyahan etj beb a ɔsu ekj yen!»

Kenie e nyandre em odad

Luk 8.1618

Matie 9.1826; Luk 8.4056

- 21 Eke Jesu anj mij jam a owr mijetj em ec'a, agj nɔnɔ gbɛl ow iwr did elul il em mij nɛny yogj.
 22 Ɛgɔ nyam eke wɛl b'ɛsɔ Jayirus, *Nyam nuɔ igj usu a ec'es ɛw ɛs anj ow ɛtj eke l'ɛkn Jesu a, l'ok ɔwrɔkp wus ow ec'any af.
 23 N'am at lebl es ni ɔɔɔn Jesu li dad l'ɛsɛ: «Ɛm jɔwli am uw. Ɔw ke át'r abu nuɔ, yec'ɛtj ke li k'úwm kɔ ke n'ánj owr.»
 24 Jesu ab n'im, ɛtj agj nɔnɔ a ek'aam ɛwl'l a am itarir l'ul il.
- 25 Bieku na ɛm, yɔw nyam eke b'ub abu ke mebl a ɛdɔm es toj ij akpo lɛw yony anj.
 26 L'ij gbɛr nɔnɔ gbɛl sos kok ɛsɛl nɔnɔ ec'abu ɛm. Ni ɔɔɔn in ec'os fɛɔ, kɔ l'ewlm, gbɛkɔ catj anake ɔl a am ɔtu yɛj'a.
 27 Ɛtj eke l'iri Jesu e lís e l'ow a, l'ow l'ey dedeku ab ɛm, l'ɛc Jesu jam, ɛtj l'itɔn ow eci mob sus ɛm a abu.
 28 Ke li dad in ec'ɛrm ɛm nine: «Blɛl mi k'itɔn in e mob sus ɛm a abu ɛɛ, ke m'ewl fɔ.»
 29 Kpɛkɔ l'ɛkn eke mebl a ek'am ok'r a ɛdɔ es, ɛtj l'ɛkan in sosi ɛm eke l'ewl in ec'ɔl ab ɛm.
 30 Akɔ af yogj ɛɛ Jesu uw any eke lɛc nyam ɛy ɔkm in ɛm. L'ɛdɔ mɛny bieku ab ɛm ɛtj n'am ibrm wɛl li dad l'ɛsɛ: «Kɔ bwo ec'ɛgɔ itɔn ɛm eci mob sus ɛm a abu ɛɛ?»
 31 In e *jam ɛsɛl a am dad'r ɛsɛ: «Ám ɛkn agj nɔnɔ na ek'am itarir l'ul'ɔ a, ke ám ibrm ɛgɔ ek'itɔn'ɔ abu ɛɛ?»
 32 Ɛtj Jesu am ɛw nyamn in e saw saw a, yec'ɛtj ke l'ɛkn ɛgɔ a eke kok low na a.
 33 Yɔw a ɛɔɔn am ɔny, n'am ufɔ, aɔke l'uw low a ek'ɛɔn'n ab any. Na sosiɛm l'ow l'ok ɔwrɔkp wus Jesu ec'any af, ɛtj l'ɛgɔ low a l'ɛb.
 34 Jesu dad'r nine: «Ɛm jɔw, ɔ ec'ɔmn a ewlm'ɔ! Ím ɛrm es ɛy ɛm, ke ɛwl ɔ ec'ɔl ab ɛm gɔɔ.»

- 35 Jesu odad anj nɛnym am dad ɛtj agj anj Jayirus ogɔ a ow. N'am dad ow l'ɛsɛ: «Ejɔɔ uw! K'ijr low yɛgm agj ɛs gbɛr ɔfr ɔfr.»
 36 Jesu usm ɛl e sodad ebl a jam kɔ li dad Jayirus nine: «K'ùru ɛɔɔn, kɔ ɔny ɔmn ɔny coco ɛɛ.»
 37 N'ɔɔm ɛgɔ kaka abusu eke k'im ɛwl'l ek'ow elm Pier, Jak lele Jan ek'el Jak lisijim ab ɛɛ.
 38 N'im l'ok Jayirus ec'akɔ a; yogj, sɔg ɔnym nuɔ. Jesu ɛkn ek'agɔ am ikɔ ɔɔn babarm.
 39 L'ey akɔ a, ɛtj n'am ibrm wɛl l'ɛsɛ: «Kɔ bla sosiɛm ɛtj am ikɔn ɔɔn ɔgr ɛɛ? Dedyɔwli a, l'uwɔm kɔ memn n'am ɛru.»
 40 Ɛtj dedeku a am kokr Jesu miyɛr. Ow sosiɛm l'ogɔ agj a fɛɔ ok ɔkm. Gbɛkɔ l'ɛsɔ iy ɛs a, iy lis a, lel in eci jam ɛsɛl agj nyahan ab ab, ɛtj l'ok akɔ a eke dedyɔwli a anj a.
 41 N'ɔny ow abu, ɛtj li dad ow nine: «*Talita, kum!*» (Ow e nyandre el: «Dedyɔwli, m'am dad'ɔ, igb!»)
 42 Kpɛkɔ dedyɔwli a igb ɛtj n'am an ɛs. Ke dedyɔwli a, n'ɔny akpo lɛw yony. Agj a fɛɔ ek'anj yogj a, low iti any.
 43 Jesu am dad ɛl lebl tuɔtuɔ ɛm ɛsɛ: «Kì dadr k'okɔ ɛgɔ kaka.» Ɛtj ɛmɛny l'igɔ af li dad nine: «`Ɔɔn in ob tel l'ij.»

6

Nasaret baɔn ɛyɔ ubm Jesu nawre

Matie 13.5358; Luk 4.1630

- 1 Jesu ɔgbɔn yogj, ɛtj n'im Nasaret baɔn a eke l'agb a. In eci *jam ɛsɛl a im ɛwl'l.
 2 *Nɛnɛgɔ e lɛgɔ a Jesu am yɛgm agj low *Nyam nuɔ igj usu a. Yogj, agj nɔnɔ anj. Eke n'am iri Jesu

eci low yegm a, low am iti el any etj n'am dad l'ese: «Kɔ bogj low na anj ow'r ee? Etj bogj eci nuj em ɔny anake n'ejn ab ee? Ayaf li b'ɔtu li kok sakrowa amua yej'ee?

3 Kɔ ejn na ow elm ɔgɔg es ɔdu es ab ee? Mari jim ab ee? Jak, Jose, Jud lele Simɔ ab ec'el lisijim ee? Etj kɔ lisijɔwɛl gbɛ irm ey ab anja ee?» Ów amua fɛj ɔm Nasaret eyj abusu eke k'ɔny ɔmn Jesu em.

4 Ow sosome li dad wɛl nine: «Usu a fɛj wɛl b'ɔny *kokoba ɔb es ec'elum, ek'ow elm in ec'eb a, in ec'agn em, lel in ec'akj ab cɛ eke wɛl ɔnym in ec'elum.»

5 Jesu ɔtum kokm akrowa kaka Nasaret yogj, ek'ow elm ɔlu beb eke l'at abu nuj ke ewl a.

6 Etj eb eyj a ec'ɔmn ɔnym a e low am at'r sel.

Jesu erm in e jam esel lew yony a

Matie 10.515; Luk 9.16

Emeny Jesu am ec baɲn baɲn a ek'anj saw saw yogj a, etj n'am yegm agj low.

7 L'ɛsj *jam esel lew yony a, etj l'ɔb nuj n'am erm wɛl agj yony yony. N'ɔj wɛl abusu *abj ejuj fɛj eci nuj af.

8 Etj n'am ijl wɛl neny li dad l'ese: «ɔny ec'ejagb us em a, k'ɔcr ob kaka ek'ow elm kpama cɛ. K'ɔcr futufutu, k'ɔcr ekpr, k'ɔcr os k'ánj ɔny ekpr em.

9 Òkr ɔkrukɔ gbɛ, ke éwal mob sus em nyam cɛ.

10 Eke batj okr akj nyam etj agj a eb ɔny a, ke ánjn yogj toj ɔny eci lɛj a eke k'imn a ow.

11 Eke batj usu nyam ec'agn ejn ebm ɔny, oglog ejn eke k'iri ɔny e neny em ec'odad, ke ókr ɔkm yogj, cícr ɔny ec'akr sec a okr el es, ke ow ij low njuj a eke li kokr a eci danju.»

12 Jam esel a im etj n'am ɔb erm em itjn eci kokoba.

13 N'am ogj abj ejuj nɔnɔ, etj n'am udu ɔlu a mun nuj l'ewlm wɛl.

Jan mij ok nuj es e luw owi

Matie 14.112; Luk 9.79

14 Eke Jesu e nin a eb es usu a fɛj a, eb eb *Erɔd Antipas yeji iri in e lebl. Wɛl am dad ese: «Jan mij ok nuj es igb luw em; na sosome anake n'am ɔny abusu li kok sakrowa a.»

15 Beb am dad ese: «*Eli.» Oglog am dad ese: «Ejn na anj ese *kokoba ɔb esel esig ab af.»

16 Ek'ów amua na ok Erɔd ɔru em a, li dad nine: «Jan mij ok nuj es a eke m'ɔj abusu wɛl ubr nuj es a, anake igb luw em a!»

1718 Kin elɛl eke Jan mij ok nuj es e luw owi a ecr. Erɔd Antipas oc lisijim Filip e yɔw Erodiad. Jan im dad Erɔd nine: «Ow itm eke k'oc esj jim e yɔw.» Etj ow sosome Erɔd ɔj abusu wɛl ɔny Jan ok njbraka elu sobel em.

19 Erodiad ɔny Jan e sifn; n'am erur eke li k'ibi ow kɔ n'ejnm ow ec'abusu,

20 anke Erɔd b'ɔny Jan eci muru. Tasi em a, li b'oc ow ese ejn lala af, ese low neny nyam es af, etj li b'ew ow erm. Eke batj l'iri Jan ec'odad, ke ow ám ew'r sel at sos em. Gbɛkɔ li b'erur eke li k'iri ow ec'odad.

21 Sica lɛj nyam Erodiad ejn abusu eke k'ibi Jan mij ok nuj es a. Ow el Erɔd e mew ec'es gbɛgl e lɛj. Erɔd esj in eci saw saw e nyimn esel a fɛj, srɔda eyj fandi eci anym esel a, lele Galile ec'agn ejn ab ab ob ij em.

22 Yogj anake Erodiad jɔw ow ey ob ij usu a, ke am ub ej a. Erɔd lel agj a eke l'ɛsj ob ij em ab ab erur dedyɔwli a e low. Etj Erɔd am dad dedyɔwli a ese: «Kɔ bla ob iy am ibrm eke mi k'ɔj ee?»

23 N'am ij neny li dad l'ese: «Ibrm im ob fɛj ek'am erur a, m'ow m'ɔj. Ek'ow el em ec'es ew a eci likpr bɔbɔ yeji, m'ow m'ɔj.»

24 Kpekɔ yɔwli a uru es im dad ok lis nine: «Em lis, kɔ bla ob iy mi k'ibrm ee?» Lis dad'r nine: «Ibirm Jan mij ok nuɔ es e nuɔ a.»

25 Kpekɔ dedycɔwli a oɔɔ es im eb ebu a oɔɔ a, etɔ li dad ow nine: «Is'm sicaca Jan mij ok nuɔ es a eci nuɔ a wayas em!»

26 Eb ebu a sos ɔw es amani a eke l'iri a eci, gbekɔ li k'ɔtum l'ɔwrm sar ij, neny a eke l'ij lele agɔ a eke ok es ab ab sosisem.

27 Kpekɔ n'ɔɔ usu ɔsu esel ab em ec'egɔ nyam abusu eke k'im ubr Jan nuɔ es. N'im sobel em yogɔ, etɔ l'ubr ow nuɔ es.

28 L'oc l'ow n'ɔɔ dedycɔwli a, etɔ ow oc im ɔɔ lis.

29 Eke Jan eci *jam esel a b'iri low na a, l'ow, etɔ l'oc ow eci sos meɔl a n'im l'oc es.

Jesu iyr agɔ ek'afɔ fandi yen es lok

Matie 14.1321; Luk 9.1017; Jan 6.114

3031 *Erm esel a eke Jesu erm a, ewl ow etɔ eke l'okr es Jesu ab a, n'am ɔb juma a fɔɔ eke li kokr a lele low a eke li yeɔgm agɔ ab ab a ec'amani l'ok ow. Eke n'am dad ow odad a, agɔ nɔnɔ am ow etɔ am ewl toɔ n'ɔnym abusu kaka fɔɔ eke li k'ij ob; etɔ Jesu dad in e *jam esel a nine: «Owr s'imn saw em aɔa, bake ébr sel tɔl.»

32 El sɔny l'ok mijetɔ em n'aam usu saw em ek'irm es.

33 El ec'im em a, agɔ ekn el, etɔ l'uw any ek'ow el Jesu lele in eci jam esel ab ab anake aam a. Kpekɔ agɔ amua anɔ baɔn a oɔɔ es ikɔ anym im ok usu a eke n'aam a.

34 Mijetɔ a b'itr es eke Jesu b'us es a, l'ekn agɔ nɔnɔ ek'ok es esɛ *mɛcɛb ek'ɔnym ɔsu es af, etɔ el owi ɔny'n sɔɔɔ. Ow sosisem, n'am yeɔgm wel ów nɔnɔ.

35 Eke lɛɔɔ ec a, jam esel a ow eɔɔn Jesu etɔ am dad'r esɛ: «Lɛɔɔ ec, etɔ usu na yeɔi ew usu saw em.

36 Òk agɔ ab es ím sɔpukpu a lele baɔn baɔn ek'anɔ saw saw aɔa ab ab em yec'etɔ ke l'ɔl ob ij.»

37 Jesu dad el nine: «ɔny obi, ðɔɔn el ob l'ij!» Li dad ow nine: «Kɔ futufutu os ekɔ lew si k'im s'ɔl s'ow s'ɔɔ el l'ij ee?»

38 Li dad wel nine: «Imn ekan! Kɔ futufutu abi anɔ ɔny ee?» N'im l'ibrm etɔ l'ewl meny l'ow li dad nine: «Futufutu yen lele ɔcn yony ab cɛ anɔ.»

39 Li dad jam esel a eke k'ɔɔ agɔ a ok es eku em eku em suw owr ab af.

40 N'ɔɔ agɔ a ok es sɛɔɔ em sɛɔɔ em. Bɛb ok es ekɔ yen yen, oglog ok es ekɔ yony lele lew lew ab.

41 Jesu oc futufutu yen a lele ɔcn yony ab ab, l'igbl any oɔɔ afr, etɔ l'elu Nyam bia. Li bubr em n'ɔɔ in e jam esel a eke ki cɛc ɔɔ agɔ a. Li cɛc wel ɔcn yony a yeɔi.

42 Agɔ a fɔɔ ij ob a lok iy.

43 Jam esel a ot ekpr a eke wal es a as luku etɔ ow iy mulu lew yony.

44 Agɔ a fɔɔ ek'ij ob a, egɔ fandi yen anɔ em.

Jesu am an es mij lekpl ab af

Matie 14.2233; Jan 6.1521

45 Kpekɔ eke low na ey oc es a, Jesu ɔɔ in e *jam esel a ok mijetɔ ab em eke k'ikɔ anym im mij lekpl a e jam a, Betsayida eb ogog a, ke n'ánɔ in obi l'afɔ bieku ab es.

46 Eke l'elu wel es a, l'uyu lafeny ab af eke li ki ɔɔɔn Nyam.

47 Eke lɛɔɔ am uk a, jam esel a anɔ mijetɔ ab em, mij araɔn yogɔ, etɔ Jesu anɔ ákpaf a.

48 Jesu ekn eke jam esel a am ij gbre mij ɔr ab em, anke lef am elu ɔbr el. Eke leɣɣ am eny ow a, Jesu am an es mij ab af im eɣn el, n'am ɔl eke li k'afɣ wel es.

49 L'eKn ow ek'ow am an es mij ab af ow; li tutr ek'ow el ɔɣnabɣ, etɣ n'am babarm.

50 El feɣ l'eKn ow etɣ li kpikprɛ es. Kpeɣ Jesu dad el nine: «Erm úsu ɔny lokm! Erɣn k'óny ɔny! Kɔ em!»

51 L'ey mijetɣ ab em li sig wel es em, etɣ lef a irm es. Jam esel a low iti any toɣ afɣn es,

52 anke akrowa a ek'ey futufutu a eci cɛc em a, l'irim ow okm el es sos em, el ec'erm tuɔtuɔ a sosiem.

Jesu ewlm ɔlu Genesaret wus af

Matie 14.3436

53 Eke Jesu lel in eci jam esel ab ab ubr mij lekpl a e jam a, n'im l'ok Genesaret eb em. L'itr mijetɣ ab es, etɣ l'us es.

54 El ec'es us em a, kpeɣ agɣ uw Jesu any,

55 l'ewl amani a wus ikpr a nimum af etɣ agɣ ot el ec'ɔlu ogo af am ow yogɣ a eke l'irir eke Jesu anɣ a.

56 Usu a feɣ eke Jesu am ey a, ke ow el baɣn gbɛl em o, ke ow el baɣn likekli em o, ke ow el kpukpu em o, agɣ am ot ɔlu ow ejɛm araɣn. N'am ɣɔɣn ow eke ow ki yeb wel itɣn in e mob sus em a ec'enymbri a cɛ abu, etɣ agɣ a feɣ ek'am itɣn mob sus em a abu a, am ewl.

7

Ey lagɣel ec'eb ir owi

Matie 15.19

1 Ca *Farisiel lel ol e *low yegm esel beb ek'anɣ Jerusalem ow ab ab, iwr did elul Jesu em.

2 L'ebmn nyamn eke Jesu e *jam esel ab em ec'agɣ beb yɔgm sabu esɛ elɛl eke el ec'eb ir a am ibrm ab af, etɣ n'am ij ob.

3 Ke tasi em a, Farisiel lele Jwifel beb ab ogɣ a, eke yɔgm abu, k'ɔtum ijm ob; anke li b'ucu el agɣiyel ec'eb ir owi amua n'ɔny es.

4 Na sosiem, eke n'anɣ an ɔl usu batɣ l'ow gbugɣ, l'ijmn ob eke l'akprɛ mij sos. Etɣ emeny n'ɔny agɣ em ec'eb ir owi nɔnɔ yej'eke li b'ɔsu esɛ mij kpɔk, ob ijr kpokpo lele sijɔwrɛ ab ec'elɛl eke wel k'etɣn es ab af.

5 Ow sosiem Farisiel a lel ol e low yegm esel ab ab am ibrm Jesu esɛ: «Kɔ bla etɣ ey lagɣel ec'eb ir owi a ek'ɔɣ ey a, ɣ e jam esel a éluam ee? Li b'ot sabu ek'aylm n'am ijr ob.»

6 Jesu am dad el esɛ: «ɔny, agɣ enymbri yony yony esel! Nawre tasi, Esayi dad ɔny e lís e low in e kokoba ɔb ab em:

Nyam dad eke agɣ amua na neny em ɔfr ɔfr

n'am kɔklm im,

kɔ el ec'erm a kpab es em e lís.

7 Nuɣ ɔfr ɔfr agɣ amua am igɣ'm,

anke agɣ em ec'ów anake li b'oc

n'am yegmn agɣ low a.»

8 Etɣ emeny Jesu usr af dad nine: «ɔny bi waal Nyam ec'ol a ec'ów a elul es, etɣ b'ucur agɣ em ec'a

Dru ablu ebrm nyam ec'ewlm owi

31 Sica Jesu ηgboη Tir eci wus ab af, ecr Sidon eci, ubr Eb Lew a e wus ab af, im ok Galile e mij a ogη a.

32 Agη oc egη nyam ek'oru abl ke s'tum dadm odad okm es a is Jesu, etη am ηoηn'n eke li k'at ow abu nuη.

33 Jesu elu bieku ab es, oc olu a im saw em. L'ot sabu ey l'ok ow oru em, etη l'oc in e sar n'nyam a l'udu ow anm.

34 Sica Jesu igbl any ogη afr, bubm sel ok etη dad egη a nine: «*Efata!*» (Ow e nyandre el «Fig!»)

35 Kpekη egη a am iri ow, anm kpab'r es n'nyam etη l'ob nuη n'am dad odad senyn senyn.

36 Jesu ijl agη a neny dad nine: «Ki dadr low na k'òkr egη kaka!» Sica eke li b'ijl wel neny eke wel k'í dadm a, yogη anake agη a yeji, b'im am ob low a ec'amani a.

37 Agη a feη anη low any iti ligbel em toη am dad ese: «Feη eke li bi kok a b'el ow amamn ofr. Li bi kok s'ru ablu am iri ow etη el a ek'stum dadm odad a, yeji bi dad ow.»

8

Jesu iyr agη fandi yar lok

Matie 15.3239

1 Legη ab em, emeny agη n'ob gbel ow iwr did elul Jesu em. Eke n'nyam ob kaka eke li k'ij a, Jesu esη in e *jam esel a, etη dad el nine:

2 «Agη amua e low am ony'm s'orη, anke kin seηη emum nyahan etη eke n'anηη em ab ke n'nyam ob kaka eke li k'ij.

3 Eke m'am elu el es n'im namn, li k'ow n'nyamn lec el ec'ejagb us em, anke el em ec'agη nyam nyam anη susu kpekpe ow.»

4 In e jam esel a am dad'r ese: «Etη sica bogη si k'etη ob ij s'orη el usu saw em na ek'egη irm ab ee?»

5 Jesu ibrm el nine: «Kò futufutu abi onymn ab ee?» Etη jam esel a dad nine: «L'obη.»

6 Sica Jesu orη abusu eke dedeku a k'ok es wus. L'ot futufutu l'obη a, l'elu Nyam bia, li bubr em, etη n'orη in e jam esel a eke ki cec dedeku a. Etη jam esel a cec orη el feη.

7 N'nyam on abi ka ab. Jesu oc yeci yeji elu Nyam bia etη orη jam esel a eke ki cec orη el.

8 Agη a ij ob molok iy el toη ob wawal es. Jam esel a ec ot ob a feη eke wal es a etη ow ij mulu egbel l'obη.

9 Agη a feη ek'ij ob a, otu eke k'ij agη fandi yar. Sica Jesu orη el abusu eke li k'im,

10 etη kpekη in lel in e jam esel ab ab l'ok mijetη ab em n'im Dalmanuta eci wus ab af.

Farisiel am ibrm eke Jesu ki kok meny ewr nyam

Matie 16.14

11 *Farisiel ow etη Jesu etη am atar ow es in ab. Eke l'erurir eke li k'uk ow meb a sosiem, li dad ow nine: «Kòk meny ewr nyam orη ey yec'etη ke s'uw any tasi ek'ow el Nyam erm'η ow.»

12 Jesu bubm sel ok etη dad nine: «Bla sosiem etη yefenyina ec'agη amua am ibrm eke k'ekn meny ewr ee? M'am dad ony nawre em tasi: wel k'ow kokm meny ewr kaka om ony.»

13 Etη l'elu wel es, l'ey mijetη ab em l'ubr mij jam a.

Jam esel a low a k'okm es sos em kaka

Matie 16.512; Luk 12.1

14 Eke n'im a, *jam esel a ijl es eke k'eb futufutu, ek'ow elm futufutu nyam a ce eke n'onymn ab mijetj ab em a.

15 Jesu am ijl el neny dad ese: «`Ewr erm! Ke ósur sos *Farisiel lele *Erød ab e lijru a e lís.»

16 Jam esel a ek'iri low na a am dadarir el çfr em ese: «Eke s'ebm futufutu a sosiem anake n'am dad ey ów amua a.»

17 Eke Jesu iri ów a eke n'am dadarir el çfr em a, n'am dad wel l'ese: «Kò bla sosiem etj am dadr esre: «Eke s'ebm futufutu a sosiem ee? Kò k'irimn ce ee? Kò ow k'okm çny es sos em ce ee? Kò çny ec'erm tuçtuç a sosiem ee?»

1819 *Çny elil anyamn etj éknmn es ee? Elil çru etj írimn ów ee?* K'òknmn lægñ a eke m'ubr futufutu yen em m'çñ agñ fandi yen a ij a, ow a ek'akm el a, mulu abi anake ecr otr ab ee?» Li dad nine: «Lew yony.»

20 Emeny l'ibrm wel nine: «Lægñ a eke m'ubr futufutu lóbnj ab em m'çñ agñ fandi yar a ij a, ow a ek'akm el a, mulu abi anake ec otr ab ee?» Li dad nine: «Lóbnj.»

21 Etj Jesu usr af dad el nine: «Etj emeny sica k'irimn ow k'okm çny es sos em ce ee?»

Jesu ewlm any eflu nyam Betsayida

22 Jesu lel in e jam esel ab ab im ok Betsayida. Yogñ agñ oc any eflu nyam ow etj am ñçñn'n eke li k'itjñ ow abu.

23 Jesu ucu any eflu a abu çny etj oc'r ab im baññ saw a. Yogñ l'oc sar l'ubr ow anyamn em, l'ok ow sabu any etj l'ibrm ow nine: «Kò am ekn es ee?»

24 Any eflu a fifig anyamn etj dad nine: «M'am ekn agñ ek'am an es, gbekò m'am ekn el ese ekñ af.»

25 Emeny Jesu ok'r sabu any etj n'am ekn es senyn senyn. Sica l'ewl tasi etj n'am ekn ob feñ ese eled ek'ow it ab af.

26 Etj Jesu dad'r nine: «Èb ejagb im gbugñ; kò k'òkñ any kpekñ kpekñ k'im k'ey agñ ab em.»

Pier dad eke Jesu in el Mesi

Matie 16.1320; Luk 9.1821

27 Ow e jam a, Jesu lel in e *jam esel ab ab us ejagb aam baññ baññ a ek'anñ Sesare Filip eci wus ab af a. Eke n'anññ ejagb n'aam a, Jesu ibrm in e jam esel a nine: «Kò ayaf agñ bi dadr em e lís ee?»

28 Li dad ow nine: «Agñ beb bi dad ese ñ Jan mij ok nuñ es, beb bi dad ese ñ *Eli, etj agñ likpr ec'a, li b'oc'ñ ese *kokoba çb esel ab em e nyam af.»

29 Etj Jesu ibrm el nine: «Kò çny obi çny obi a, ayaf b'ocar'm ee?» Pier çdu eb dad nine: «I] el *Mesi a.»

30 Jesu ijl el neny kponj kponj eke li ki dadmn in e lís e low l'okmn egñ kaka.

Jesu am ewar in e luw lel in e luw em anñ igb ab

Matie 16.2128; Luk 9.2227

31 Jesu am yeçm in e *jam esel a low dad el ese: «Ow it ek'egñ ec'*Iy k'ij gbre nòç; ke agñ ekpek, *egb waw esel egbel lel ol e *low yeçm esel ab ígñ elu'l es, óñ wel ibi'r ke segn nyahan, l'ígb agñ ek'uw ab em.»

32 N'am dad wel sodad amua l'erum mar. Na sosiem Pier oc'r ab im saw em etj am enym'n abr dad'r ese: «Kì dad odad nené.»

33 Eke Jesu ewl meny ler in e jam esel a, li dad Pier lebl tuçtuç em nine: «*Satan, kpàb'm es lís, anke ñ e

tutr a elm Nyam e tutr, kɔ na agɔ ɛm e tutr.»

Elele eke wɛl k'usr Jesu jam

34 Eke Jesu ɛɔɔ dedeku a lel in e *jam ɛsɛl ab ab a, n'am dad wɛl l'ɛsɛ: «Ek'ɛɔɔ nyam am erur eke k'us'm jam a, ow it ke li kɪ tutrm in e lɪs owi, l'ábu in obi ec'olikh a ke l'ús'm jam.

35 Tasi ɛm a, ɛɔɔ yec'eke b'ow erur eke ki dogɔɔ in e sel a, b'ow irmn. Gbɛkɔ ɛɔɔ yec'eke b'ow irmn in e sel a Amani Mamm a lel ɛm sosiɛm ab a, b'ow ɛɔɔ.

36 Eke batɔ ɛɔɔ nyam ɔny wus ec'ob fɛɔ ɛtɔ l'irmn in e sel a, ke bla ow b'ow eel il ab ee?

37 ɛtɔ bla ob iy ɛɔɔ ɔtu eke k'oc sɔɔr in e sel ab ee?

38 Yɛfɛnyana ec'agɔ amua el sikpl ɛsɛl lel ɛnyɛmbri yony yony ɛsɛl ab Nyam ec'any af. Ek'ɛɔɔ nyam ɛs am ɔny ɛm lel ɛm e sodad ebl ab ab sosiɛm agɔ amua ec'araɔɔ, ɛbɛn cɛ ɛɔɔ ec'*Iy yɛɔi ɛs b'ow ɔny, lɛɔɔ eke li b'ow l'ow ɛs ec'anygbɛl ɛm, *afr ɛrm ɛsɛl lala ab ab a.»

9

Jesu itɔɔn sos

Matie 17.113; Luk 9.2836

1 ɛmɛny Jesu dad ɛl nine: «Low nawrɛ m'am dad ɔny: agɔ amua ek'anɔ aɔa a e bɛb b'ow ɛkn Nyam ec'*es ɛw a ow abusu ɔny ɛm gbɔɔ ke l'uw.»

2 Eke ɛɔɔ nɔhɔn ɛc a, Jesu ɛɔɔ Pier, Jak lele Jan ab ɛtɔ li kpab es n'im saw ɛm ɛl ɔny lafɛny gege nyam af. Yogɔ, Jesu itɔɔn sos ɛl ec'any af.

3 In eci mob sus ɛm a e jeɔn a afɔɔ es; wus af aɔa, ɛɔɔ kaka anm eke k'ɔɔ in eci mob sus ɛm a jeɔn ɛbɛn.

4 ɛtɔ kpɛkɔ *Eli lele *Mois ab okm sos ɔkm ɛtɔ am dad ów Jesu ab.

5 Eke Pier b'ɛkn ɛbɛn a, li dad Jesu nine: «Low yɛgm agɔ ɛs, ow akpl eke si k'anɔ aɔa! S'ús nuɔ igɔ usu nyahan: ɔ e nyam, Mois e nyam lel Eli e nyam ab.»

6 Tasi ɛm a, Pier ɛknm odad eke ki dad aɔke ɛl nyahan mum ɛrɔɔ am ɔny ɛl.

7 Kpɛkɔ jru ɛy ɛtɔ ubur ɛl es. ɛtɔ lebl nyam anɔ jru ab ɛm am ikɔ dad ɛsɛ: «ɛɔɔ na ɛl ɛm ec'*Iy eke m'erur tasi; ìrir in e low.»

8 Kpɛkɔ *jam ɛsɛl a am ɔl saw saw, gbɛkɔ l'ɛknm ɛɔɔ kaka ek'ow elm Jesu ɔny cɛ ek'anɔ ɛl ab a.

9 Eke n'anɔn lafɛny ab af n'am us es a, Jesu ijɔ ɛl nɛny dad nine: «Low na ek'ɛkan a, kɪ dadr k'okr ɛɔɔ kaka, tɔɔ bake ɛɔɔ ec'*Iy ígb agɔ ek'uw ab ɛm.»

10 L'ɛɔɔ low a l'eb, gbɛkɔ n'am ibrmnin ɛl ɔfr l'ɛsɛ: «Ke ɛɔɔ ec'Iy ígb agɔ ek'uw ab ɛm e nyandɛ ɛl ayaf ee?»

11 ɛmɛny jam ɛsɛl a am ibrm Jesu ɛsɛ: «Dàd ɛy, kɔ bla sosiɛm ɛtɔ ol e *low yɛgm ɛsɛl a bi dad ek'Eli in k'ow gbɔɔ ke Mesi a in ów ee?»

12 Jesu dad ɛl nine: «ɛɛ, Eli eke li k'ow ke ni nyímn ów a fɛɔ. Gbɛkɔ bla sosiɛm Nyam Lel ɛm wɛl nɔn ek'ɛɔɔ ec'Iy b'ow ij gbɛ nɔnɔ ke wɛl k'úbm'n ee?

13 M'am dad ɔny ek'Eli ec'a, l'ow lɛɔɔ a ɛtɔ, ɛtɔ agɔ kok'r low yec'a eke l'erurir a ɛsɛ lele eke wɛl nɔn ab af.»

Jesu ewlm iy nyam ek'abɔ ɔny b'ijr gbɛ

Matie 17.1421; Luk 9.3743a

14 Eke l'owr n'ejan *jam esel likpr a, l'ekn dedeku ek'elul wel em, etj wel am atar ów es ol e *low yegm esel ab ab.

15 Eke dedeku a b'ekn Jesu a, low iti el any etj kpekj n'am uru es n'im l'esjn ow.

16 Jesu ibrm jam esel a nine: «Kɔ bla owi am atarir es ee?»

17 Dedeku ab em a, egj nyam ɔdu eb dad nine: «Low yegm agj es, m'oc em jim ek'ɔny *abj njj ke ɔm'n li dadm odad a m'is'j.»

18 Usu kaka fej ek'abj na b'ey'r af a, ow b'ɔny elu'l ow wus, sar ufu ám ifl'l neny, n'ám sasagr an em, ke n'ám ecan es. Mi dad nj e jam esel a eke k'ogj abj ikj na in em, etj l'ɔtum n'ɔnym ow ec'abusu.»

19 Jesu dad in e jam esel a nine: «ɔny tasi, eel agj eke ɔmn anm em! Emeny sejj abi m'it eke mi k'anj ɔny ab ee? Etj emeny sakp abi ow it eke mi k'egj low na m'eb ee? Òcr iy a isr'm aja!»

20 Wel oc iy a is'r. Ek'abj njj a b'ekn Jesu a, l'ufj iy a lec em, n'ɔny l'elu ow wus. Iy a am wuwl wus yogj etj sar ufu am ifl'l neny.

21 Jesu ibrm iy es a nine: «Kɔ ow ij sejj abi ek'abj njj na anj'n af ee?» Iy es a dad nine: «In e likekli em etj.»

22 Sakp oglog abj a b'ɔny elu'l alm, oglog mij em eke k'ibi'r. Ek'ɔtu e ki kok, ikj ey ɔɔj ke élum ey abu!»

23 Jesu am dad'r ese: «Kɔ bla etj am dad ese: «Ek'ɔtu e ki kok ee?» Wel ɔtu eke ki kok low low fej egj eke b'ɔny ɔmn a eci.»

24 Kpekj iy es a igbl lebl ogj etj am dad ese: «M'ub nawre! `Elum im abu ke em ec'ɔmn ɔnym a óc es em em.»

25 Eke Jesu ekn agj a ek'am uru ow a, l'oc lebl tuɔtuɔ em n'am dad abj njj a l'ese: «Abj eke b'ɔj egj el ebrm lel ɔru ablu ab, m'am dad'j: `y ɔkm iy na em, k'èwl meny k'ow in em ij!»

26 Abj njj a babarm, ufj iy a lec em etj l'ey ɔkm. Iy a ew ese ek'ow'n uw ce af, toj agj ek'anj yogj a am dad ese: «Iy a, l'uw.»

27 Gbɛkɔ Jesu ɔny iy a abu etj ow ɔj l'igb n'inym es.

28 Eke Jesu im gbugj, ke in eci jam esel ab ab n'anjn el ɔny a, n'am ibrm ow l'ese: «Kɔ bla etj ey s'ɔtum s'ɔnym abusu s'ogjm abj na ee?»

29 Jesu am dad el ese: «Abj akpasu na, Nyam njjn em ce wel b'ogj'n l'ey ɔkm.»

Emeny Jesu am ewar in e luw lele in e luw em anj igb ab

Matie 17.2223; Luk 9.43b45

30 Sica n'ngboj usu a eke n'anjn a, etj l'ubr Galile ogog a. Jesu e tutr em a, k'egj k'úwm yogj a eke n'anj ab any.

31 N'am yegm in e *jam esel a low li dad wel l'ese: «Wel b'ow ɔny egj ec'*Iy elu agj abu em, ke l'ibi ow. Eke ow b'ow kok sejj nyahan a, li b'ow l'igb luw em.»

32 Gbɛkɔ low yegm ikj na, jam esel a k'irim ow eci nyandre a, etj n'am uru eke li k'ibrm Jesu low na ec'akr otar a.

Egj ligbel ec'el owi

Matie 18.15; Luk 9.4648

33 N'im l'ey Kapernayum; eke n'imn l'okr akj a, Jesu am ibrm in e *jam esel a ese: «Kɔ ejagb us em a, bla owi anake am atarir es ab ee?»

34 El a feɲ li yewal, anke ejagb af a, l'atar ów es, n'am dadarir el ɔfr em l'ese: «Kɔ bwo el ey ec'anymu ee?»

35 Sica Jesu sig es, etɲ l'eseɲ jam esel lew yony a feɲ, etɲ n'am dad wɛl l'ese: «Eke eɲɲ nyam erur eke k'el ɔny ec'anymu, ke l'él ɔny a feɲ eci jam ablu, l'él ɔny feɲ eci ob oc ɔɲ es.»

36 Etɲ Jesu ɔny iyli nyam abu ow araɲɲ yogɲ el ec'any af, l'oc ow etɲ n'am dad wɛl l'ese:

37 «Ek'eseɲ eb ey amua em e nyam em sosiem a, ke em anake l'eb'm a. Etɲ eɲɲ a ek'eb'm a, ow elm em obi l'ebm im, kɔ eɲɲ a ek'erm'm a anake l'eb eben a.»

Ɛɲɲ ek'elm ey ec'ifnu a el ey ec'eseɲ

Luk 9.4950

38 Jan dad Jesu nine: «Low yeɲm aɲɲ es, s'ekn eɲɲ nyam eke oc ɲ e nin a am kokr juma ogɲɲ *abɲ eɲɲɲ. S'edɲɲ in, eke l'elm ey ec'eseɲ a sosiem.»

39 Jesu dad nine: «Ɛɲɲ k'édɲɲ in, anke eɲɲ kaka anm eke b'ow oc em e nin a kokr sakrowa, ke kpeɲɲ ow e jam a, ɔtu dad em e nin ɲɲɲ ec'odad.

40 Tasi em a, eɲɲ ek'ifnu ey a, el ey ec'eseɲ.

41 Low nawre m'am dad ɔny: eɲɲ kaka feɲ ek'ɔɲ ɔny mij kpɔk em eɲɲɲ, *Krist ec'agɲ ek'eel a sosiem a, eɲɲ ikɲ na, li b'ow n'eɲɲ in e labm ɔɔɲ.»

Ɛw erm ke k'eym sikpl em

Matie 18.69; Luk 17.12

42 Emeny Jesu usr af dad nine: «Ɛɲɲ eke b'ow ɔny eɲɲ ek'ɔny ɔmn em em ese iy na af elu wus a, low ɲɲɲ a eke li k'eɲɲ a agb nɔnɔ. Eke wɛl oc meb ucur lob ligbel ucu'r emn, etɲ ɔny eman in okij a, ow akpl akm low ɲɲɲ a eke wɛl ki kok'r a.

43 Eke batɲ ow el ɲ e ec'abu a anake b'ɔɲ ey sikpl owi em a, ke ùbr'r es, anke ow akpl ɲ eci eke k'ey sel eɲɲ tasi ab em abu nyam coco ab, ow a eke k'eli sabu yony ke ím anɲ *gbre ij usu, yogɲ a eke al ek'iram es anɲ a. [

44 *Yogɲ, sisɲ a eke b'ij sos meɲl a, l'uwmn, etɲ al a ek'anɲ yogɲ a yeɲi iram es kaka.*]

45 Etɲ ek'ow el ɲ e lakr a anake b'ɔɲ ey sikpl owi em a, ke ùbr'r es, anke ow akpl ɲ eci eke k'ey sel eɲɲ tasi ab em lakr nyam coco ab, ow a eke k'eli akr yony ke ím gbre ij usu a. [

46 *Yogɲ, sisɲ a eke b'ij sos meɲl a, l'uwmn, etɲ al a ek'anɲ yogɲ a yeɲi iram es kaka.*]

47 Eke batɲ ow el ɲ e nyamn a anake b'ɔɲ ey sikpl owi em a, ðkr ɔny oc'r es, ow akpl ɲ eci eke k'oc nyamn nyam ab ey Nyam eci *gbreɲɲɲ usu ab em, ow a eke k'eli anyamn yony ke wɛl ɔny ɔw'l'ɲ gbre ij usu a.

48 *Yogɲ, sisɲ a eke b'ij sos meɲl a, l'uwmn, etɲ al a ek'anɲ yogɲ a yeɲi iram es kaka.*

49 Tasi em a, eɲɲ eɲɲ b'ow ecr al eci gbre ijr ab em, yec'etɲ ke ebm ekn na áyal il ese egb waw eke wɛl b'ok mok af ab af.

50 Mok el ob mamn. Eke batɲ l'irmn in e ded a, ayaf wɛl ki kokr ke l'éwl meny li ded ee? Ow akpl ek'ɔny em a, mok e ded ikɲ na k'anɲ, yec'etɲ ke ɔny ɔfr em a, ír erm es ey ec'eb.»

10

Igɲɲin owi

Matie 19.112; Luk 16.18

1 Jesu igb yogɲ im Jude wus af, etɲ l'ubr Jurden jam a. Emeny aɲɲ nɔnɔ ow as luku elul il em; ese seɲɲ

feh ec'a eke li bi kok ab af, n'am yegm agn a low.

2 Eke *Farisiel k'ebm Jesu a sosiem, l'ow n'ehñ ow etñ n'am ibrm ow l'ese: «Kò ey ec'ol ab em abusu eru es eke ign k'elu in e yow es ee?»

3 Jesu ibrm el nine: «Kò low yegm eke Mois òñ ony a el bogñ ec'ee?»

4 Li dad nine: «Mois òñ abusu eke wel ki non ignñin e lel gbuñ ke ign ógn in e yow.»

5 Ow sosiem Jesu dad el nine: «Mois non ol ikñ na anke ony, eel agñ erm tuotuo esel.

6 Gbekò wus e nuñ òb em a, eke Nyam kok ów a feh a, li kok wel ign lele yow ab.

7 Na sosiem anake ign b'ow ñgboñ es lele lis ab ec'akñ,

8 ke l'ókr af in e yow ab ab l'el sos megl nyam a. Ca l'elm agñ yony ij, kò sos megl nyam.

9 Ke egn k'ónym yec'eke Nyam ony okr af a, kpabm es.»

10 Sica eke Jesu lele in e jam esel ab ab im ok akñ a, emeny *jam esel a am ibrm'n ów, odad a eke li dad ab af.

11 Jesu dad el nine: «Ign feh eke elu in e yow es, ke im ebi yow ejec'a, l'ij *nfaci krekre e yow a ec'any af ñ.

12 Etñ eke yow nyam elu in ec'ign es etñ im oc ign ejec'a, in yeji l'ij nfaci ñ.»

Jesu edñ etuey ówrò

Matie 19.1315; Luk 18.1517

13 Agñ ot etuey aam Jesu ogñ eke li k'at wel abu nuñ, gbekò *jam esel a am enym el abr.

14 Eke Jesu b'ekñ eben a, ow e low ebl'l erm etñ li dad in e jam esel a nine: «Yèbr etuey ow em ogñ! Egn k'édñ el, anke tasi em a Nyam e *gbreñgbi usu a, agñ a ek'anñ ese el af a eci.

15 Low nawre m'am dad ony, egn kaka feh ek'egñm Nyam e *gbreñgbi usu a ebm ese iyli af a, egn ikñ na, legñ kaka li k'ow l'ótum l'eym em.»

16 Etñ Jesu am ot ey a, at el abu nuñ edñ el ówrò.

Ígn feh elu es ke ús Jesu jam

Matie 19.1630; Luk 18.1830

17 Ejagb ce eke Jesu us eke k'im a, kpekñ egn nyam uru es ec'r anym ok ówròkp wus etñ am ibrm'n ese: «Low yegm agñ es mamn, kò ayaf mi ki kokr ke m'ij sel eñ ek'ónym uwr ec'aja ee?»

18 Jesu dad'r nine: «Kò bla etñ am esñ'm egn mamn ee? Egn kaka elm egn mamn, ek'ow elm Nyam sony coco ce.

19 Kò uw sol ab any ee? *K'ibim egn, k'ijm *nfaci, k'ým mil, k'ijm danku yadh em egn e nuñ af, kí kokm leyri owi egn e lís, élum asñ lele esñ ab.»*

20 Egn a dad'r nine: «Low yegm agñ es, likekli em etñ mi b'elum sol amua feh.»

21 Jesu ler'r, ony in ec'erur etñ dad'r nine: «Ow anññ low nyam ce. Ìm òl ñ ec'ob ek'ony a ij, òc ow ec'os a ony ógboru, ke b'ow eññ ob ony afr, ca éwl meny ow us'm jam.»

22 Ek'egñ a iri odad na a, ow e low edñ'n ermni es, etñ n'aam sos es ów em, anke n'onny ob nonò.

23 Eke Jesu ler in e *jam esel a ek'anñ'n saw saw a, li dad wel nine: «Nyam e *gbreñgbi usu a ec'em ey a ew tuotuo agñ a ek'ony ob nonò a eci gbe!»

24 Jam esel a low iti any low na eke l'irir a sosiem; etñ Jesu ewl am dad el ese: «Èm jimel, Nyam eci gbreñgbi usu a ec'em ey a ew tuotuo.

25 Kin, gbanjó kedebnam eci fefn ómu em eke k'ecr a, ew fuéfue akm gbreñgbi eci Nyam e gbreñgbi usu ec'em ey a.»

26 Ow ɔŋ jam esel a eci low any iti a am afɛn es, etɔ n'am dadarir el ɔfr em l'ese: «Kɔ sica bwo ec'egɔ ɔtu ek'eɔn sel ee?»

27 Jesu ok el anyamn af, etɔ dad el nine: «Aɔ ec'any af a, ow ew tuɔtuɔ, kɔ ow elm Nyam ec'any af a gbɛ, aŋke Nyam ec'a, fɛɔ ew fuefue!»

28 Af yogɔ Pier dad'r nine: «Ŋ obi yeji èkn! Ey, s'igɔ fɛɔ s'ok es etɔ s'us'ɔ jam.»

29 Jesu dad'r nine: «Low nawre m'am dad ɔny: eke em lele Amani Mamn ab ab sosisem egɔ nyam igɔ in ec'akɔ, lisijimel, lisijɔwel, lis, es, in ec'ey, in e sɔgm elu es a,

30 segɔ amua eke s'anɔ em ab em, li b'ow n'eɔn ów amua e sakp ekɔ yen ok af: akɔ, lisijimel, lisijɔwel, lisel, ey lele sɔgm ab. Etɔ li b'ow l'ɔbr gbɛ ijr yeji. Ke sica segɔ a eke anɔ anym am ow ab em a, n'eɔn sel ek'ɔnym uwr.

31 Gbɛkɔ ánymu ab em eci nɔnɔ b'ow ewl el ajamu, etɔ ajamu ab em e nɔnɔ, b'ow ewl el ánymu.»

Jesu ewar sakp nyahan em in e luw lele

in e luw em anɔ igb ab

Matie 20.1719; Luk 18.3134

32 Jesu us ejagb agɔ a ek'am us'r jam ab ab, l'ikɔ wel anym n'am uyu n'im Jerusalem. *Jam esel a ermni edɔ es, etɔ agɔ a ek'am us'r jam a erɔn ow sos. Jesu esɔ lew yony a saw em eke ki dad el low yec'a eke b'ow eɔn'a.

3334 Li dad nine: «Ìsr any èkan, kin Jerusalem anake s'am uyu s'im a; yogɔ egɔ ec'*Iy b'ow ey *egb waw esel egbel lel ol e *low yegm esel ab ab ec'abu em. Li b'ow l'ɔb ow low luw eci, etɔ li b'ow l'oc ow n'ɔn Nyam any uwm esel kokr'r miyer, afl'l sar any, ɔr'r say em, ke l'ibi ow. Gbɛkɔ eke segɔ nyahan b'ow ec a, li b'ow l'igb luw em.»

Jak lele Jan ab e low ek'ibrm

Matie 20.2028; Luk 22.2427

35 Sica Sebede jimel a, Jak lele Jan ab, ow eɔn Jesu etɔ am dad'r ese: «Low yegm agɔ es, s'am erur eke low yec'eke si b'ow s'ibrm'ɔ a, kók ɔɔ ey.»

36 Jesu ibrm el nine: «Kɔ bla lowi am erurir eke mi ki kok m'ɔnɔ ɔny ee?»

37 Li dad ow nine: «Lɛɔ eke b'ow anɔ ɔ ec'anygbel em a, èɔn ɔɔ ey abusu ke s'ók es ɔ ab: egɔ nyam síg'ɔ es lidr ogog ke nyam síg'ɔ es nɛmn ogog.»

38 Gbɛkɔ Jesu dad el nine: «Low yec'a ek'am ibrmn a, k'uwmn any. Kɔ ɔtur eke b'ow egɔn gbɛ e mij kpɔk a eke m'ow m'egɔ a, oglog wel ok ɔny gbɛ e mij nuɔ a eke wel b'ow ok'm ab ee?»

39 Li dad ow nine: «Eɛ, s'ɔtu.» Etɔ Jesu dad el nine: «B'ow egɔn mij kpɔk a eke m'ow m'egɔ a, etɔ wel b'ow ok ɔny mij nuɔ a eke wel b'ow ok'm a,

40 gbɛkɔ em e lidr abu af ec'es sig a lele nɛmn abu af ec'ab ab a, ow elm em m'ɔwm egɔ. Susu amua el agɔ a eke el sosisem Nyam kok ew es a eci.»

41 Eke *jam esel agɔ lew a iri low na a, n'am ebl erm l'ok Jak lele Jan ab af.

42 Ow sosisem Jesu esɔ el fɛɔ etɔ am dad el ese: «Èkan ek'agɔ a e si b'oc esɛ eb ec'es ew esel af a, b'ew eb ab es abusu ɔny em, ke el em ec'agɔ any esel ek'anɔ a, b'elu el ec'abusu ɔny a ɔkm dedeku a e nuɔ af a.

43 Gbɛkɔ ɔny eci araɔn ec'a, ow k'écr ebɛn. Eke batɔ ɔny em ec'egɔ kaka fɛɔ am erur eke k'el ɔny ec'es ew es a, ke l'él ɔny a fɛɔ ec'ob oc ɔɔ es;

44 etɔ emeny ek'ɔny em ec'egɔ kaka fɛɔ am erur eke k'el ɔny ec'anymu, ke l'él agɔ a fɛɔ ec'adu.

45 Èbɛn nyam coco egɔ ec'*Iy yeji owm ek'agɔ ki kok in e lís e low, kɔ l'ow eke li ki kok agɔ e lís e low,

ke l'óc in e sel a l'ew awoba li sɔgr agɲ nɔɔɔ.»

Jesu ewlm any eflu Bartime

Matie 20.2934; Luk 18.3543

46 Jesu lel in e *jam esel ab ab ow ok Jeriko eb em. Sica eke Jesu, in e jam esel a lel agɲ dedeku ab ab am ok ɔkm baɲn a, l'uyum any eflu nyam eke wɛl b'ɛsɲ Bartime, Time jim ab, eke sig es ejagb saw ob sasm eci.

47 Eke l'iri ek'ow el Nasaret iy Jesu a, n'am elu lebl li dad l'ese: «Jesu, David eci *lilaw, ìkɲ'm sɔɲɲ!»

48 Agɲ nɔɔɔ gbɛl erurm ɛtɲ am ɛnym'n abr eke li ki yewal, gbekɔ n'am at lebl es l'ɔg li dad l'ese: «David eci lilaw, ìkɲ'm sɔɲɲ!»

49 Jesu inym es ɛtɲ dad eke wɛl k'ɛsɲ'n any eflu a. L'ɛsɲ ow ɛtɲ li dad ow nine: «Àtr sos es igb! N'am ɛsɲ'ɲ.»

50 Any eflu a wɔg in e mob sus em a elu es, ɛtɲ l'igb kpekɲ n'im n'ɛɲn ow.

51 Jesu ibrm'n nine: «Kɔ bla lowi am erur eke mi ki kok m'ɔɲ'ɲ ee?» Any eflu a dad'r nine: «Low yɛgm agɲ es, m'am erur eke mi k'ɛwl m'ɛkn es.»

52 Jesu dad'r nine: «Ìm! ɪɲ ec'ɔmn a ewlm'ɲ.» Kpekɲ n'am ɛkn es, ɛtɲ n'am us Jesu jam.

11

Jesu am ɛy Jerusalem

Matie 21.111; Luk 19.2840; Jan 12.1219

1 Eke n'imn bake n'am titm Jerusalem, ke n'anɲn Betfaje baɲn lele Betani baɲn ab eci neny neny a, *Olivie lafeny a ogɲ a, Jesu erm in e *jam esel ab em ec'agɲ yony

2 ɛtɲ li dad wɛl nine: «Ìmn baɲn a ek'anɲ ɔny anym ab em, kpekɲ eke b'ow okr em a, b'ow ɛɲan gbaɲkɔ kpetɛɲ eke wɛl ucun es, ke lɛɲɲ kaka ɛɲɲ sigm af. Mɔmun in es k'ócr isr'm aɲa.

3 Eke batɲ ɛɲɲ b'ibrm ɔny low a sosome eke am mɔmun gbaɲkɔ kpetɛɲ na es a, dádr ɛsrɛ: «ɛɲɲ gbɛl ɔny ow ec'es abur. Gbekɔ kpekɲ cɛ li b'ow l'ɛwl meny l'ɛlu es ow ow ɛɲn'ɲ.» »

4 N'im ɛtɲ n'ɛɲn gbaɲkɔ kpetɛɲ nyam ek'ucun es gbɛɲ lisany saw, ejagb neny, ɛtɲ ni mɔmu ow es.

5 Agɲ nyam nyam ek'anɲ yogɲ a am ibrm ɛl ɛsɛ: «Kɔ bla anake am kokr ab ee? Bla sosome am mɔmun gbaɲkɔ kpetɛɲ na es ee?»

6 Jam esel a dad agɲ a yec'a eke Jesu dad ɛl a, ɛtɲ kpekɲ wɛl ɛlu ɛl es l'eb ejagb n'im.

7 L'oc gbaɲkɔ kpetɛɲ a l'is Jesu, l'ot ɛl e sigbad a l'ok ow af ɛtɲ Jesu sig es af.

8 Agɲ nɔɔɔ am ot ɛl e sigbad a ok ejagb, ɛtɲ beb ec'a, ow ɛl ɛkɲ al eke l'ubr ɔgm ɔgm a.

9 Agɲ a ek'ikɲ Jesu anym lel ɛl a ek'anɲ'n jam ab ab a, am ɔg dad ɛsɛ: «*Hosana! Anygbɛl ɛl Nyam eci! Ke Nyam ɛdɲ ɛɲɲ ek'am ow ɛs Kɔɔkɔ e nin em a ɔwrɔ!*

10 Ke Nyam ɛdɲ gbɛɲɲɲɲ usu a ec'es ɛw a ek'am ow a ɔwrɔ! ɛy lagɲ David eci gbɛɲɲɲɲ usu a ec'es ɛw a! *Anygbɛl ɛl Nyam ek'anɲ afr kpekɛ a eci!*»

11 Jesu ɛy Jerusalem ɛtɲ n'im toɲ l'ɛy *Nyamel gbɛl ab em. Eke l'ew mob a fɛɲ nyamn af uwr a, in lel in e jam esel ab ab, l'eb ejagb n'im Betani, aɲke lɛɲɲ am uk.

Jesu ofn babm ikɲ nyam

Matie 21.1819

12 Eke ləgɲ eny ke Jesu lel in e *jam esel ab ab ok ɔkm Betani a, Jesu namn ow sos.

13 Akpoj em a, l'ekn babm ikɲ nyam ek'ebu senyn senyn. Etɲ n'aam l'ekn eke li b'ow n'eyɲ ey ow em. Kɔ eke n'im li titm likɲ a, l'ekn eke ow el suw ɔfr, aŋke ow elm lakpo ek'ow it ek'ow k'ɔsu ey a.

14 Etɲ Jesu dad nine: «Ke ləgɲ kaka eɲɲ k'ɛɲnm ɲ em e liy ijm.» *Jam esel a iri odad a eke li dad a.

Jesu anɲ Nyamel gbɛl a e gbugɲ a

Matie 21.1217; Luk 19.4548; Jan 2.1322

15 Sica n'im l'ok Jerusalem. Eke Jesu ey *Nyamel gbɛl a eci gbugɲ a, n'am ogɲ án ɔlu a lel agɲ ek'am ɔ mob ab ab l'ok ɔkm. Etɲ n'ɔny jɛtɛ titɲɲ esel e sitabl a lele prendrɛ ɔl ij esel e mɛkpn ab ab l'ok wus.

16 Etɲ l'ɛgbm eɲɲ kaka es eke k'oc ob ubr Nyamel ab em.

17 Etɲ sica n'am yɛgm wel low li dad l'esɛ: «Nyam Lɛl em Nyam dad nine: *Wel b'ow esɲ em ec'ɛl a Nyam ɲɔɲɲ ec'ɛl, ebr ebr fɛɲ eci.* Kɔ ɔny, am ocr kokr elu eci eɲanin usu.»

18 Ek'*egb waw esel eɲɛl lel ol e *low yɛgm esel ab ab iri low ikɲ na a, n'am ɔl akunda yec'em eke li k'ibi Jesu. Ke tasi em a, li b'ɔny ow e muru aŋke dedeku a b'erur in e low yɛgm a.

19 Eke ləgɲ ew es a, Jesu lel in e *jam esel ab ab ok ɔkm eb ab em.

ɔny ɔmn Nyam em

Matie 21.2022

20 Ibribr em a, eke Jesu lel in e *jam esel ab ab am ɛc ebr ab af a, l'ekn babm ikɲ a e wɛw es toɲ ok min em.

21 Pier ɔkn low a ek'ɛc a, etɲ li dad Jesu nine: «Low yɛgm agɲ ɛs, lɛr! Babm ikɲ a ek'ofn ok af a wɛw es fɛɲ.»

22 Jesu am dad in e *jam esel a esɛ: «Low nawrɛ m'am dad ɔny: ɔnyn ɔmn Nyam em!

23 Ek'eɲɲ dad ligigl na eke k'ɲgboɲ aɲa im ey okij em, etɲ bebar anm'n erm em, etɲ l'ub nawrɛ eke low a e li dad a b'ow el a, tasi ow b'ow el.

24 Na sosiem m'am dad ɔny, ob fɛɲ eke b'ow ibrmn Nyam ɲɔɲɲ em a, ùbr nawrɛ eke eɲan etɲ Nyam b'ow ɔɲ ɔny.

25 Sica, eke am ɲɔɲɲ Nyam etɲ ɔkan eke ɔnyn low ɔny lawl nyam ab a, ðcr apr ir, yec'etɲ ke ɔny ɛs ek'anɲ afr a yeji áp ɔny e sikpl a. [

26 Gbɛkɔ eke k'ow apmn ɔny lawlɛl a, ɔny ɛs ek'anɲ afr a yeji k'ow apm ɔny ɔny e sikpl a.]»

Jesu ec'abusu ɔny owi

Matie 21.2327; Luk 20.18

27 ɛmeny eke Jesu lel in e *jam esel ab ab ow Jerusalem a, n'anɲ *Nyamel gbɛl a eci gbugɲ a n'am nyinymn es. *Egb waw esel, ol e *low yɛgm esel lel *agɲ ekpekɲ ab ab ow eɲn'n,

28 etɲ n'am ibrm ow l'esɛ: «Kɔ bogɲ ec'abusu em bi kok ów amua ee? Etɲ kɔ bwo b'ɔɲɲ ow e kok ec'abusu ee?»

29 Jesu dad el nine: «M'aam m'ibrm ɔny low nyam ɛɛ. Sica eke dadr'm a, em yeji mi b'ow mi dad ɔny abusu yec'em eke mi bi kok ów amua a.

30 Kɔ bwo ɔɲ Jan abusu ow ok agɲ mij nuɲ ee? Kɔ Nyam oglog agɲ ee? Dàdr'm m'iri.»

31 Ow ɛw el ów es atar el ɔfr em etɲ n'am dad l'esɛ: «Eke si dad eke Nyam ɔɲ'n abusu l'ow, li b'ow l'ibrm ey l'esɛ: «Kɔ bla sosiem etɲ ubmn in nawrɛ ee?»

32 Etɲ eke si dad eke agɲ ɔɲ'n abusu l'ow, yeci yeji es abur.» (N'ɔny dedeku a e muru, aŋke el fɛɲ li b'oc

Jan *kokoba ɔb es tasi.)

33 Ɛtɔ sica li dad Jesu nine: «S'uwm any.» Ɛtɔ Jesu yeji dad el nine: «Eke ow el eɓen a, em yeji mi k'ow mi dadm ɔny abusu yec'em eke mi bi kok ów amua feɔ a.»

12

Viny ɔgm e juma kok esel eɔny ec'odad nyandre em

Matie 21.3346; Luk 20.919

1 Ow e jam a, emeny Jesu am dad el odad nyandre em ese: «Lɛgɔ nyam ɔgm es nyam ewl viny in ec'egb ɔgm a. N'awɔ lakp l'elul em, li kok usu eke wɛl k'ifi egb ey ab es, etɔ li kok usu gege eke wɛl k'anɔ ɔsu ɔgm a. Ɛtɔ l'oc egb ɔgm a l'abul ɔgm juma kok esel, etɔ l'eb ejagb n'im usu.

2 Ek'egb ub e lakpo ow a, egb ɔgm es a erm in ec'abu elum es nyam im eke juma kok esel a k'ɔɔ'n in ec'egb a eke k'ebm'n a.

3 Juma kok esel a ɔny abu elum es a, l'ɔr ow etɔ l'ewlm ow meny ow im abu ɔfr.

4 Emeny egb ɔgm es a erm abu elum es nyam im. In ec'a, li kok ow ob nuɔ etɔ li kok ow sos keskes.

5 Emeny egb ɔgm es a erm abu elum es ejeci nyam im. In ec'a, n'ɔny ow etɔ l'ibi ow. L'erm abu elum esel ejec'im, kɔ li kok wɛl low nenyembri nyam a ce: l'ɔr beb etɔ l'ibi likpr.

6 Sica in ec'iy eke l'erur tasi a ce el eɔgɔ ek'anɔ'n abu em. Ow anake l'abal es l'erm ow ek'ow k'im ekn wɛl a, aɔke in e tutr em a, ek'ow el in ec'iy a, wɛl b'ow ɔny ow ec'elum.

7 Gbɛkɔ eke juma kok esel a ekn iy a, n'am dadarir el ɔfr em l'ese: «Kin eɔgɔ a eke godo godo b'ow el aja ij es a. S'ímn, s'íbir ir, ke egb ɔgm a él ey eci.»

8 N'ɔny iy a, l'ibi ow, etɔ l'oc ow e sos meɔl a l'ɔwl ɔgm a e jam a.»

9 Sica Jesu ibrm nine: «Egb ɔgm es a, bla li b'ow li kok ab ee? Li b'ow l'ow, l'ibi juma kok esel a, ke l'óc egb ɔgm a l'elul agɔ ejec'abu em.

10 Kɔ ɔny awlmn odad na eke wɛl nɔn Nyam Lɛl em ab ee?

Lebn a eke él us esel a oc ɔwl a,

ewl el él lɔy em e lebn tasi.

11 Na low eke anɔ Nyam oɔgɔ ow

ke el low ɔɔbɔ ey ec'any af.»

12 Sica Jwifel ec'es ewɛl a am ɔl akunda yec'em eke k'ew Jesu abu af, aɔke l'uw any eke el ow dad odad nyandre em na ok el af. Gbɛkɔ dedeku a e muru sosiem a, l'egb ow es etɔ l'eb ejagb n'im.

Kɔ wɛl sɔg wus labm ee?

Matie 22.1522; Luk 20.2026

13 Jwifel ec'es ewɛl a erm *Farisiel ec'agɔ nyam nyam lele *Erɔd ec'ogog ec'agɔ nyam nyam ab ow eke k'uk Jesu meb ke n'ɔny ów ow ec'odad ebl ab em.

14 L'ow n'ɛɔn Jesu etɔ li dad ow nine: «Low yegm agɔ es, s'uw any eke ɔ bi dad low nenyembri nyam, ɔnym eɔgɔ kaka e muru; ɔ ec'a, agɔ a feɔ el agɔ nenyembri nyam, etɔ Nyam ec'elel eke am ibrm eke si k'iir eb a, bi yegm ow ec'ejagb a kpɛɔ. Dàd ey ɔ! Kɔ ey ec'ol ab em, abusu eru es eke si ki sɔg wus labm s'ɔɔ Sesar es ee? Ow it eke si ki sɔg ee?»

15 Gbɛkɔ Jesu ek'uw el e kprakpr ab any a dad el nine: «Bla sosiem etɔ am ukr'm meb ee? Òcr os a isr'm ke m'ékɔ.»

16 L'oc os a l'is ow, etj Jesu ibrm el nine: «Meny ewr na lele nin na eke wel non os na af a, bwo ec'egj ec'ow el ee?» Li dad nine: «Sesar eci.»

17 Etj Jesu dad el nine: «Eke ow el eben a, ðñn Sesar yec'ek'el Sesar ec'a, ke ðñn Nyam yec'ek'el Nyam ec'a.» Etj Jesu eci low ikj na e dad el a ew el any iti.

Luw em anj igb

Matie 22.2333; Luk 20.2740

18 Legj nyam, *Sadusiel em ec'agj likpr ow ejn Jesu. (Ke Sadusiel anake bi dad ese luw em anj igb in anm a.) N'am ibrm Jesu low na l'ese:

19 «Low yegm agj es, Mois non ol na ðñ ey dad nine: *Eke igj nyam ebi yow etj l'ewm iy kaka toj l'uw, ow akpl ke lisijim eb ihnyow a ebi, ew ey in ab ew lisijim nin es.*

20 Kin agj lisijimel lbnj e low ek'ejn: likpekp a ebi yow, l'ewm iy kaka ow ab etj l'uw.

21 Yony em ec'a eb ihnyow a ebi, l'ewm iy kaka ow ab etj in yeji l'uw. Low nenyembri nyam a, ejn nyahan em ec'a yeji;

22 agj a lbnj mum, egj egj ebi yow a kò l'ewm iy kaka, etj el fej l'uw. Ek'el fej l'uw a, yow a yeji uw.

23 Sica legj a ek'agj ek'uw a b'ow igb luw em a, bwo ec'egj e yow tasi li b'ow l'el ab ee? Anke el a fej egj egj ebi'r ow el in e yow.»

24 Jesu dad el nine: «Nje, ðny na irm anake am irmn a! Etj uwr low nuj af ek'am irmn ab any ee? ðny uwmn Nyam Lel a eke wel non ab any, etj Nyam ec'abusu a yeji uwmn any.

25 Tasi em a, legj ek'agj b'ow anj luw em igb a, egj lele ðyow ab k'ow ebirm okm es ij, kò li b'ow l'ir eb ese elel eke *afr erm esel anjn afr ab af.

26 Sica yec'ek'el uwomu em anj igb ec'a, awlmn Mois e lel e non ab em, yogj a eke wel dad kati ek'am iri ke étum es a ec'odad ab ee? Wel non dad eke Nyam dad Mois nine: *Em m'el Abraham e Nyam, Isak e Nyam, lele Jakòb e Nyam ab.*»

27 Etj Jesu usr af dad nine: «Kò agj eke uw a e Nyam li k'el ee? Njan, l'el agj ek'uw ke anj owr a e Nyam. Nje, ðny na irm anake am irmn a!»

Ol ab em eci ligbel tasi a

Matie 22.3440; Luk 10.2528

28 Ol e *low yegm es nyam iri el ec'ow es atar a, etj l'ekn eke Jesu ec'odad a e dad *Sadusiel a el low tasi. L'eri l'ow li titm ow etj n'am ibrm ow l'ese: «Ol a fej em e ligbel el bogj ec'ee?»

29 Jesu dad'r nine: «Kin ol a fej em e ligbel: *O Israel, igj loru es! Es Kòkò ey e Nyam el Nyam nyam coco.*

30 *B'ow erur Asj Kòkò ñ e Nyam ñ ec'erm fej em, ñ ec'abñ fej em, ñ e tutr fej em lele ñ e lec pupukpan ab.*

31 Etj kin ol a e yony em ek'ot krekre ec'ab es: *B'ow erur egj kaka fej ese ñ obi af.* Ol a fej em, kaka anm agbm akam ol yony na.»

32 Ol e low yegm es a dad Jesu nine: «Low yegm agj es, ow akpl! Low nawre tasi anake dad a: *Es Kòkò el Nyam nyam coco, etj Nyam kaka anm ek'ow elm in sony ce.*

33 *Nje ek'egj erur Nyam in ec'erm fej em, in e tutr fej em, lele in e lec pupukpan ab, etj l'erur egj kaka fej ese in obi af a, na akpl akm mindey eke li k'im Nyam ec'any af l'ofj, lel egb waw erj erj eke li ki kok n'çj ow ab ab.»*

34 Jesu ekn ek'ol e low yegm es a dad low a nuj em ðny em, etj li dad ow nine: «Ij, titm Nyam e *gbregjbi usu a.» Ow e jam a, egj kaka úsm ibram Jesu low ij.

Mesi a lele David ab

Matie 22.4146; Luk 20.4144

35 Eke Jesu anɔ *Nyamel gbɛl ab ɛm am yɛgm agɔ low a, l'ibrm nine: «Ayaf ɛtɔ ol e *low yɛgm ɛsɛl ɔtu e ki dad ɛsɛ: *Mesi el David e lilaw ee?»

36 David, ek'Abɔ Lala ow'r af a, in obi li dad nine:

Ɛs Kɔtɔkɔ Nyam dad ɛm Ɛs Kɔtɔkɔ nine:

Òw sig ɛs ɛm e lidr abu af

toɔ bake m'ót ɔ ec'efnu a m'ok ɔ ec'akr ew.

37 Eke sica David b'ɛsɔ'n «Ɛs Kɔtɔkɔ», ke ayaf Mesi a ɔtu eke k'el David e lilaw ee?» Agɔ nɔnɔ gbɛl am erur Jesu ec'odad ek'am dad a.

Ki kokr ɛsɛ ol e low yɛgm ɛsɛl ec'ab af

Matie 23.136; Luk 20.4547

38 Jesu in e low yɛgm ab ɛm am dad el ɛsɛ: «Ɛwr sos ɛrm ol e *low yɛgm ɛsɛl amua eke bi sus mob akpakp am ok ɔkm ɛc a e lís. Li b'erur eke dedeku ɛm wɛl k'ɛsɔn el elum ɛm,

39 ɛtɔ *Nyam nuɔ igr e susu a, li bi dogɔn mekpɔn anym ɛs; ɛs gbɛgbɛl ec'ob ij owi ɛm yɛji, li b'erur susu amamn.

40 Li b'ufɔ ɛɔnyɔw ɛb ɛs, ɛtɔ li bi kok nyandre l'ɔfur Nyam ɔɔn yec'ɛtɔ ke wɛl ót el agɔ amamn. Na sosisem anake el e jej ok a b'ow ɛw tuɔtuɔ a.»

Iɔnyɔw gbɔr yɔw a ec'ob ap a

Luk 21.14

41 Sica Jesu sig ɛs ɔbr usu a eke wɛl kok *Nyamel gbɛl ab ɛm ob ap ec'ab any, ɛtɔ n'am lɛr elɛl eke agɔ a am apr ob a. Egbɛɔgbi nɔnɔ am ok os nɔnɔ kɔpɔ ebr mob ab ɛm.

42 Iɔnyɔw gbɔr yɔw nyam ow ɛtɔ elu os ekekey yony ek'usm any yɛji kɔpɔ ebr ob ab ɛm.

43 Jesu am dad in e *jam ɛsɛl a ɛsɛ: «Low nawre m'am dad ɔny, iɔnyɔw gbɔr yɔw na ap ob akm agɔ likpr a fɛɔ,

44 aɔke el ec'a n'ɔn el ec'ob e n'ɔnyɔn a ec'ow ek'igr af a; kɔ iɔnyɔw a ec'a, n'ɔn in e gbɔr ɛm ec'a eke n'ɔny a, ow a fɛɔ a eke li k'iir ɛb af a.»

13

Nyamel gbɛl a e ɔɔn

Matie 24.12; Luk 21.56

1 Eke Jesu anɔ *Nyamel gbɛl ab ɛm ɛy ɔkm a, in e *jam ɛsɛl ab ɛm ec'ɛgɔ nyam dad'r nine: «Low yɛgm agɔ ɛs, is any ɛkn mebn egbɛl amua lele mel egbɛl amua ab ɔ!»

2 Jesu dad'r nine: «Mel egbɛl amua ek'am ɛkn a, kaka k'ow anm; fɛɔ b'ow ɛr ok wus. Lebn kaka k'ow anm lawl af ij.»

Lɛgɔ ɛs abal el e gbɛr owi

Matie 24.314; Luk 21.719

3 Sica eke Jesu sig es *Olivie lafeny af ɔbr *Nyamel gbel ab any a, Pier, Jak, Jan lele Andre ab ek'anŋ in ab el ɔny a, am ibrm'n low saw em ese:

4 «Dàd ey ɔ! Kɔ bogŋ lɛgŋ iy low na b'ow ey, etŋ ów amua feŋ eke b'ow ey a e meny ewr el bogŋ ec'ee?»

5 Jesu am dad el ese: «Èwr erm! Kì yebr eŋŋ k'irmn ɔny.

6 Tasi em a, agŋ nɔnɔ b'ow ow em e nin em dad ese: «Em *Mesi a,» etŋ li b'ow l'irmn agŋ bubute.

7 Eke batŋ am irir ar ek'am ey aŋa e likekr lel ar owi eke b'ow ey akpoj a ec'amani ab a, erŋn k'ɔny ɔny. Ow it eke ów amua k'ey, kɔ ow elm wus e nuŋ edŋ.

8 Tasi em a, ebr nyam ec'agŋ b'ow im eŋn ebr ejeci nyam ogŋ ar; es ew nyam b'ow im eŋn es ew ejeci ar ogŋ eci. Susu nɔnɔ wus b'ow umu etŋ lek yeji b'ow ey. Ów amua feŋ b'ow ew ese iy ɔny eci dudu krɛkrɛ ab af.

9 Gbɛkɔ ɔny, ɔny obi ɔny obi a, èwr erm. Agŋ b'ow ot im ɔny jej ok ec'any af. Wel b'ow ɔr ɔny *Nyam ŋuŋ igŋ susu. Em e nin a eci danŋku ij sosiem, wel b'ow ot im ɔny es ew esel lele éb ebu ab ec'any af.

10 Ow it eke krɛkrɛ em a, wel k'ɔb Amani Mamn a e kokoba ok ebr ebr a feŋ.

11 Etŋ eke wel b'ow ot im ɔny jej ok ec'any af a, ermij k'íkŋ anym k'ok ɔny ow a eke b'ow dadr a eci. Dàdr wanci ab af ec'a ce eke Nyam b'ow ɔŋ ɔny a, aŋke sodad a k'ow anm ɔny em owm, kɔ Abŋ Lala a b'ow dad odad a ɔŋ ɔny.

12 Agŋ lisijimel b'ow ot el lisijimel lokm ow ibi eci; ey esel yeji b'ow kok eben el ec'ey e lís, ey yeji b'ow ɔbr el esel any, ɔŋ wel ibi el.

13 Em sosiem, agŋ a feŋ b'ow ifn ɔny; gbɛkɔ eŋŋ eke b'ow inym es kikri tonŋ ow e nuŋ edŋ em a, b'ow eŋn sel.»

Musue ob iy

Matie 24.1528; Luk 21.2024

14 «Ke sica b'ow ekan «Musue ob iy» anŋ yogŋ ek'itm eke li k'anŋ a. (Ke eŋŋ eke b'ow awl ów amua a, íri senyn senyn.) Ke kɛkɛŋ agŋ a eke b'ow anŋ Jude wus af a, ow akpl ke l'uru es n'im mafeny em.

15 Eŋŋ eke b'ow anŋ in ec'él afr e lɛf eb usu a, k'úsm es eym akŋ ocm ob;

16 etŋ eŋŋ eke b'ow anŋ ɔgm a, k'éwlm iim jam ocm in e mob af ew a ij.

17 Segŋ amua b'ow ew tuɔtuɔ molok ab lisel lel el ek'am ɔŋ ey meny ab ab eci.

18 Nyam ŋɔŋŋ a át es yec'etŋ ke low na k'éym nyam es us em,

19 aŋke segŋ na em a, *gbre ij a b'ow ew tuɔtuɔ afŋŋ es. Ow b'ow akm gbre ij feŋ ek'anŋ lɛgŋ a etŋ eke Nyam kok ów a feŋ tonŋ k'ít yefenyina ec'a.* Lɛgŋ kaka gbre ij na k'ow anm ij.

20 Etŋ blel Es Kɔtɔkɔ isrm segŋ amua em, ke eŋŋ kaka blel ɔtum anm owr. L'isr segŋ amua em agŋ a eke li ɔsum l'ot a sosiem eci.

21 Eke batŋ eŋŋ nyam bi dad ɔny ese: «Èkan, *Mesi a anŋ aŋa!» oglog: «N'anŋ yogŋ a!» k'ùbr eŋŋ a nawre.

22 Tasi em a, mesiel ayadŋu lele *kokoba ɔb esel ayadŋu ab b'ow ok ɔkm. Li b'ow li kok meny ewr lele ów any iti owi ab agŋ ec'irmn eci, ke ek'ow it yeji, l'ɔtu l'irmn agŋ a eke Nyam ɔsum ot a.

23 ɔny ec'a, èwr erm! M'íkŋ anym m'ewar ɔny ów amua feŋ eke b'ow ey a eci.»

Eŋŋ ec'Iy eci mowrer

Matie 24.2931; Luk 21.2528

24 Emeny Jesu igŋ af nine: «Gbɛkɔ segŋ ab em, eke gbre ij owi na feŋ b'ow ec ok es a, *ligbn b'ow irm es etŋ awl yeji k'ow afŋŋ ij.*

25 *Mílél b'ow ok wus etŋ afr ec'abusu owi feŋ b'ow wuwal.*

26 Sica yogŋ anake wɛl b'ow ɛkn ɛgŋ ec'*Iy eke b'ow anŋ afr e jru em am ow, abusu fɛŋ lele anygbɛl ab a.
 27 Li b'ow l'ism *afr erm ɛsɛl ab, ɛtŋ li b'ow l'as agŋ a eke li sɔsum l'ot a luku, wus na ec'ɔy yar ab em, toŋ l'ok afr e nuŋ.»

Low yɛgm eke babm e likŋ a am ɛlu ɔkm

Matie 24.3235; Luk 21.2933

28 Sica Jesu dad nine: «Kin low yɛgm ek'el babm e likŋ a eci eke k'irir: kɛkɛŋ eke in ec'ál a b'ɛw wɔwɔwɔ, ke n'am gɪgŋ ɔdɔdɔ a, kɛkɛŋ b'uwr any eke mewij ow titm ŋ.
 29 Ɛben nyam coco eke b'ɛkan ów amua am ow a, ke kɛkɛŋ úwr any eke low a titm, ɛtŋ ow b'ow ɛy.
 30 Low nawrɛ m'am dad ɔny: yɛfɛnyana ec'agŋ fɛŋ k'ow uwm uwrɛ ɛtŋ ów amua b'ow ɛy.
 31 Afr lele wus ab b'ow ɛc, gbɛkɔ lɛgŋ kaka ɛm e sodad a k'ow ɛcm.

Nyam sɔny coco uw lɛgŋ a e nuŋ ɛdŋ ab any

Matie 24.3644

32 Gbɛkɔ ów a e lɛgŋ lele wanci ab ab eke b'ow ɛy a, ɛgŋ kaka uwm any, *afr erm ɛsɛl yɛji uwm any, ɛgŋ ec'*Iy bɔbɔ yɛji uwm any, ek'ow elm ɛm Ɛs sɔny coco.
 33 `Ɛwr erm! Mɛmn k'íbi ɔny, aŋke uwmn lɛgŋ ab any.
 34 Ow anŋ ɛsɛ ɛgŋ nyam ek'aam usu, ke oc in ec'akŋ a abul in eci juma kok ɛsɛl a ke ɔŋ ɛl ów fɛŋ ec'abusu af. N'ɔŋ ɛgŋ nyam nyam eci juma eke ki kok ɛtŋ li dad usu ɔsu ɛs a eke k'anŋ any owr ke ám ɔsu usu a.
 35 `Ɔsur, aŋke uwmn wanci a ek'akŋ ɛs a b'ow ɛwl mɛny ow ab any. Ow k'ɔdm ke l'ów ncebles ɛm, ncok eci lɛgŋ uyu nuŋ ɛm, ŋgɔs ikŋ ɛm, oglog ibribr.
 36 Eke l'ow l'okɔ ɔny ɛs kpru, li k'ɛŋŋ ɔny mɛmn ɛru ɛm.
 37 Odad na eke m'am dad ɔny a, agŋ a fɛŋ anake m'am dad a: Àŋŋn any owr!»

14

Es ɛw ɛsɛl am ut Jesu ec'íbi a ec'asre

Matie 26.15; Luk 22.12; Jan 11.4553

1 Ow anŋ sɛgŋ yony ke *Pak lele *Futufutu ek'ejrɔ ánm ɛm ec'ɛs gbɛgbl a e lɛgŋ ɛy. *Egb waw ɛsɛl ɛgbɛl lele ol e *low yɛgm ɛsɛl ab ab am as luku ɔl eel eke k'ɔnyŋ Jesu ɛw ɛw ɛm ke l'íbi ow a.
 2 Gbɛkɔ n'am dad ɛl ɔfr ɛm l'ɛsɛ: «Ow itm eke si k'ɔny'n ɛs gbɛgbl na ɛm; ek'ow el ɛben, bɔbar a owi b'ow ɛy bieku ab ɛm.»

Yɔw nyam ok Jesu mijey nuŋ

Matie 26.613; Jan 12.18

3 Jesu im Betani baŋŋ, Simɔ a eke lɛgŋ anym ɛm *kokobe ok a ec'akŋ. Eke Jesu anŋ ob ij lɔfu lís a, yɔw nyam ow titm'n. N'ɔnyŋ án gbɛl e mijey kɔk nyam eke wɛl kok lebn ɛm ab; lebn na, wɛl b'ɛsŋ'n albatr, ke mijey a el nar tasi ɛm. N'ɔny l'ɔb ɛs ɛtŋ l'ɛwl l'ok Jesu nuŋ.
 4 Agŋ a ek'anŋ yogŋ a eci bɛb erurm ɛtŋ am ɛny abr dad ɛl ɔfr ɛm ɛsɛ: «Kɔ na, ow elm ob ŋuŋŋ ana ee?
 5 Ow itm eke mijey ikŋ na, wɛl k'ɔl ij os ekŋ yen yen sakp nyahan, oc ow ec'os a ɔŋ ɔgbɔru ee?» Ɛtŋ n'am cak cak yɔw a ɛrm bebl ɛm.
 6 Gbɛkɔ Jesu dad nine: «`Ɛgbr yɔw ab ɛs tiŋ! Kɔ bla ɛtŋ am ijar ir gbɛr ee? Low na eke li kok ɛm e lís a

el low nimamn.

7 Tasi em a, ɔgbɔru ec'a, n'anɔ ɔny ab seɔɔ a feɔ, leɔɔ kaka feɔ ek'erurir a, ɔtur eke ki kokr el ów amamn; kɔ em, seɔɔ a feɔ mi k'ow m'anm ɔny ab.

8 Yɔw na kok low yec'a eke l'ɔtu eke li ki kok a. L'ikɔ anym l'ok'm mijey na sos, em ec'uwɔmu em anɔ a eci.

9 Low nawre m'am dad ɔny, wus na nimum af ec'usu kaka feɔ eke wel b'ow ɔb Amani Mamn a eci kokoba a, wel b'ow ɔkn yɔw na e low, ke wel dád low a eke li kok a yeɔi.»

Judas am bebɔm eke b'ow ɔl Jesu ij

Matie 26.1416; Luk 22.36

10 Sica, *jam esel lew yony ab em ec'egɔ nyam eke wel b'esɔ Judas Iskariɔt, im eɔɔ *egb waw esel egbel a, eɔɔ dad el eke k'ɔny Jesu ɔɔ el.

11 Eke l'irir odad na a, sos em ijɔ el toɔ l'egɔ l'eb eke li k'ɔɔ ow os. Ow ɔɔ Judas am ɔl akunda senyn yec'em eke li k'ɔny Jesu n'ɔɔ wel.

Pak ec'ob ij a eci sos bebɔm

Matie 26.1725; Luk 22.714, 2123; Jan 13.2130

12 *Futufutu ek'eɔru ánm em e leɔɔ krekre eke wel b'ibi meceb *Pak ec'es gbegbl ec'ob ij ec'a, *jam esel a ibrm Jesu nine: «Kɔ bogɔ am erur eke si k'im si bebɔm Pak ec'ob ij a e sos ee?»

13 Eɔɔ Jesu dad in e jam esel ab em ec'agɔ yony nine: «Ímɔ baɔn a, b'ow ɔbar eɔɔ nyam ek'uyu mijel. Úsr eɔɔ ikɔ na jam,

14 ke akɔ yec'eke li b'ow l'ey a, dádɔ akɔ es a eke low yeɔm agɔ es am ibrm usu a ek'in eci jam esel ab ab el k'ij Pak ec'ob a.

15 Li b'ow li yeɔm ɔny él afr yogɔ, oj gbɔl nyam eke akɔ e mob a feɔ iy neny em. Yogɔ anake b'ow kokr Pak ec'ob ij a.»

16 Jam esel a im ok baɔn a, eɔɔ feɔ a ese elel eke Es Kɔtɔkɔ dadɔ el ab af, eɔɔ li bebɔm Pak ec'ob ij a eci sos.

17 Leɔɔ es ew em a, Jesu lele *jam esel lew yony ab ab im yogɔ.

18 Eke n'anɔ ob ij usu ke n'am ij ob a, Jesu dad el nine: «Low nawre m'am dad ɔny: ɔny em ec'egɔ nyam ek'am ij ob em ab a, b'ow ɔl ij'm.»

19 Jam esel a feɔ sos ɔw es eɔɔ eɔɔ agɔ am ibrm'n ese: «Kɔ ow ɔtu eke k'el em ee?»

20 Li dad wel nine: «ɔny lew yony ab em ec'egɔ nyam, in a ek'am us abu em ab lɔfu nyam em a.

21 Ee, tasi, eɔɔ ec'*Iy b'ow uw ese elel eke Nyam Lel ewar in e lís ab af; gbekɔ gbɔl él eɔɔ a ek'am ɔl ij'r a eci! Eɔɔ ikɔ na, blel wel ewm'n bɔbɔ yeɔi.»

Ob ij lala

Matie 26.2630; Luk 22.1520; 1 Korent 11.2325

22 Eke n'am ij ob a, Jesu oc futufutu, l'elu Nyam bia, l'ubr em, n'ɔɔ in e *jam esel a eɔɔ li dad nine: «Èbr, na el em e sos meɔl.»

23 Èmeny l'oc mij kpɔk eke mar anɔ em, l'elu Nyam bia, n'ɔɔ in e jam esel a; eɔɔ el feɔ l'egɔ.

24 Sica Jesu dad el nine: «Na el em e mebl, Nyam e *sinm a e mebl ek'am ow ok es agɔ nɔnɔ eci.

25 Low nawre m'am dad ɔny: mi k'ow m'egɔm mar na sakp ejeci toɔ ke ow él Nyam e *gbɔɔɔgbi usu a eci mar owr eke mi k'egɔ.»

26 Sica l'egɲ es gbɛgbl a ec'ej ba ow b'uwr, etɲ n'im *Olivie lafeny af.

Pier b'ow egbr Jesu

Matie 26.3135; Luk 22.3134; Jan 13.3638

27 Jesu am dad in e *jam esel a ese: «Low a eke b'ow etɲn'm a b'ow ok ɔny wus ɔny eci ɔmn ab em. Tasi em a, Nyam Lel ab em wel nɔn eke m'ow m'ibi *mɛceb ɔsu es a etɲ mɛceb a feɲ b'ow ɔmu es.

28 Gbɛkɔ em eci uwɔmu em anɲ igb em a, m'ow m'ikɲ anym m'im Galile m'eku ɔny.»

29 Pier dad'r nine: «Ek'agɲ a feɲ b'ow igɲ elu ɲ es yeji, ow k'ow elm em gbɛ!»

30 Jesu dad'r nine: «Low nawrɛ m'am dad'ɲ: nɔk na cɛ, gbuj ke ɲgɔs íkɲ sakp yony a, b'ow egbr'm sakp nyahan dad eke uwm im any.»

31 Kɔ Pier am dad lebl tuɔtuɔ em ese: «Eke ow it ɲ ab eci luw bɔbɔ yeji, mi k'ow m'ɔtum mi dadm m'esme m'uwm'ɲ any.» Etɲ jam esel ejec'a yeji dad ebɛn.

Jesu am ɲɔɲɲ Nyam Jese mane

Matie 26.3646; Luk 22.3946

32 Jesu lele in e *jam esel ab ab im ok usu nyam eke wel b'esɲ Jese mane. Jesu dad in e jam esel a nine: «Eke m'aam mi ɲɔɲɲ Nyam a, òkr es aɲa.»

33 Etɲ l'esɲ Pier, Jak lele Jan ab eke k'im in ab. Sos ɔb nuɲ am ɔw'r es etɲ erm mij yeji am ok'r afɲɲ in es.

34 Li dad wel nine: «Sos es ɔw ek'el luw eci afɲɲ em ec'abɲ ab es; òkr es aɲa ke ɔsur.»

35 L'eri n'im kpekpe tɛl, l'ok ɔwrɔkp wus, l'ubu any es, etɲ n'am ɲɔɲɲ Nyam ek'ow it ke gbɛ ij eci wanci ikɲ na kpáb'r es lís.

36 N'am dad l'ese: «Aba, em Es, ɲ em ów feɲ ec'abusu a anɲ; ɔny gbɛ e mij kpɔk na kpab'm es lís. Ke feɲ em a, ow k'él yec'a eke m'am erur a, kɔ yec'a eke ɲ am erur a.»

37 Etɲ l'ow n'etɲn jam esel nyahan a eke memn ibi. Li dad Pier nine: «Simɔ, am eru memn! Kɔ wanci nyam bɔbɔ yeji ɔtum ɔsum ee?

38 Ànɲɲ any owr ɔsur ke ɲɔɲɲ, yec'etɲ ke k'éymn ebm ekn owi em. ɔny ec'abɲ a gbɛ inym es low feɲ e kok eci, kɔ ɔny e sos megl a gbɛ ijm læc ij.»

39 Emeny l'ewl meny n'im etɲ Nyam ɲɔɲɲ a el nenyembri nyam a cɛ.

40 Eke emeny l'ewl meny l'ow in e jam esel ogɲ a, n'etɲn wel memn eru em. Memn am bɔbm el anyamn; ow ɔɲ l'uwmn low yec'eke li ki dad Jesu ab any.

41 Sakp nyahan em ec'a eke Jesu ewl ow a, n'am dad in e jam esel a l'ese: «Am erur memn cɛ ebr sel ee? Sica ow bebmn ab ɲ! Wanci a eke wel b'ow ɔl egɲ ec'*Iy ij *sikpl esel ec'abu em a, ow ɲ.

42 Ìgbr, s'ímn! Kin, egɲ a eke am ɔl ij'm a ow titm ɲ!»

Jesu ec'ɔny

Matie 26.4756; Luk 22.4753; Jan 18.312

43 Jesu odad anɲ nenym k'uwrɲ etɲ kpekɲ Judas, *jam esel lew yony ab em ec'egɲ nyam ilm any. Agɲ a ek'ow in ab a, ɔnym ekɲ ekpr lele mab ler em ab. *Egb waw esel egbɛl, ol e *low yeɲm esel lel *agɲ ekpekɲ ab ab anake erm el a.

44 Judas eke b'ow ɔl Jesu ij a, ikɛ anym yegm dedeku a akunda yec'em eke li k'ɔnyɔn ow a. Li dad nine: «Egɛ a eke m'ow mi joj neny a, in ana; ɔnyɔn in, ɔcr imn in, ke ɔsur ir senyn senyn gɔɛ.»
 45 Kpekɛ eke Judas im titm Jesu a, li dad nine: «Low yegm agɛ es!» Etɛ li joj ow neny.
 46 Kpekɛ agɛ a ok'r af ɔny'n.
 47 Jam esel ab em ec'egɛ nyam ɔdu in e lab ler em a eb, l'iyɛ *egb waw es ligbel a ec'abu elum es a etɛ l'ubr ow lɔru es.

48 Jesu ɔdu odad eb etɛ am dad dedeku a ese: «Kɔ em eci ɔny a, ibrm eke k'otr ekɛ ekpr lele mab ler em ab owɛ, ese low ɛɛ kok es em el af ee?»
 49 ɔny ab ce m'ann seɛɛ a feɛ. Mi bi yegm agɛ low *Nyamel gbel a e gbugɛ etɛ ɔnymn'm. Gbekɔ ow ey, yec'etɛ ke Nyam Lel em ec'ow a eke wel nɔn a íy neny.»
 50 Kpekɛ jam esel a feɛ igɛ Jesu elu es, uru es im.
 51 ɛgbafɛ nyam eke gbad ikpr nyam ce ann sos, am us Jesu jam. Wel k'ɔny'n,
 52 gbekɔ l'igɛ in e gbad a l'elu es, l'uru es sos ɔfr n'im.

Jesu im Sanedrɛn ec'agɛ a ec'any af

Matie 26.5768; Luk 22.5455, 6371; Jan 18.1314, 1924

53 Agɛ a oc Jesu im *egb waw es ligbel a eci gbugɛ a; yogɛ egb waw esel egbel a feɛ, *agɛ ekpekɛ a, lel ol e *low yegm esel ab ab as luku.
 54 Pier ann akpɔj em am us Jesu jam. N'im toɛ l'ey egb waw es ligbel a eci gbugɛ a. N'im n'eyɛn usu ɔsu esel a etɛ li sig es al saw n'am ɔgbu al.
 55 Egb waw esel egbel a lele *Sanedrɛn ec'agɛ ejec'a feɛ ab am ɔl danɛu ij nyam eke k'ɔbr Jesu low yec'etɛ ke l'ibi ow, kɔ n'eyɛnmn low kaka.
 56 Tasi em a, agɛ nɔnɔ am ij danɛu yadɛ em Jesu e nuɛ af, kɔ el ɔfr eci danɛu ij ab em yeɛi, neny ɔkrm el af.
 57 Agɛ beb igb etɛ am ij danɛu yadɛ em in e nuɛ af dad ese:
 58 «S'irir nenym li dad nine: «*Nyamel gbel na ek'agɛ ec'abu in us a, in b'ow in ɔny in er in ok; eke ow'n b'ow in ij seɛɛ nyahan a, in b'ow in us ejeci nyam ek'in elm agɛ ec'abu em ec'ek'in us.» »
 59 Odad na af bɔbɔ yeɛi neny okrm el af el e danɛu ij ab em.

60 Kpekɛ egb waw es ligbel a igb agɛ a feɛ ec'any af, etɛ am ibrm Jesu ese: «Kɔ wel ám dad sodad amua ok'ɛ af, ke k'ɔbm kpu ee?»
 61 Kɔ Jesu yewal tiɛ; li cicm sar l'okm ow es. Emeny egb waw es ligbel a am ibrm'n sakp yony em ese: «Kɔ ɛ *Mesi, Nyam a eke si b'igɛ nuɛ a ec'Iy ee?»
 62 Jesu eɛɛ dad nine: «Ee, m'el; etɛ ɔny feɛ, b'ow ekan eɛɛ ec'*Iy eke sig es Nyam abusu Es eci lidr abu af, ke b'ow ann afr eci jru em ám ow.»
 63 Odad na sosiem, egb waw es ligbel a ɔny in eci simob sus em a gbagbrm em, etɛ dad nine: «Ey, s'ibram adanɛu ij!
 64 ɔny obi yeɛi irir eke li dad low ɔbr any owi Nyam e lís. Kɔ ɔny e tutɛ el bogɛ ec'ee?» Agɛ a feɛ ɔb Jesu low ek'el in ec'ibi eci.
 65 Etɛ em yogɛ ec'agɛ beb am afl' sar any. N'awɛ ow any es, n'am ɔr ow kukuta em, etɛ n'am ibrm ow l'ese: «Tùtr ke úlm eɛɛ a es!» ɔbɔwi a eb'r abu em etɛ am dedɛɛn any af.

Pier egbr Jesu

Matie 26.6975; Luk 22.5662; Jan 18.1518, 2527

66 Էտյ eke Pier anյ wus a gbugյ yogյ Ե a, *egb waw Եs ligbel a eci ob oc Ծյ liseb ab e nyam ow,
67 Էտյ Էkn'n eke n'am Ծgbu al. L'ok any Եs li ler ow Եsenyn Եsenyn Էտյ li dad ow nine: «Իյ yeji anյ Nasaret e Jesu ab.»

68 Կ՞ l'egbr li dad nine: «Mi k'irim Եsenyn Եsenyn; low yec'a Էk'am Ծl eke ki dad a, mi k'uwm any.» N'imn gbeյ lisany a eci [Էտյ րց՞ճ Էկյ].

69 Ob oc Ծյ lis a Էkn'n, Էտյ ԷմԵny am dad agյ a Էk'anյ yogյ a Եse: «Էցյ na, jam Եsel ab Էm Էc'egյ nyam!»

70 Կ՞ Pier Էgbr sakp yony Էm dad nine: «Njan! Kaka!» Էk'ow ibn tel a, agյ a Էk'anյ yogյ a, am dad Pier Եse: «Tasi, րյ jam Եsel ab Էm Էc'egյ nyam, anյke րյ Galile wus af Էc'egյ!»

71 GbԷk՞ Pier Ծdu Էb dad nine: «Էk'ow el yadյ m'am Ծny, ke Nyam k՞k'm low րյյ! M'am ofn mi dad Էk'egյ na Էk'am dadr in e low a m'uwm'n any.»

72 Odad na anյ'n Ենym n'am dad Էտյ kբԷկյ, րց՞ճ Էկյ sakp yony Էm. Ow Ծյ Pier Ծkn low a eke Jesu dad'r a: «Gbuյ ke րց՞ճ Էկյ sakp yony a, b'ow dad sakp nyahan eke uwm im any.» Ow sosisem, n'am Էկյ Ծրն.

15

WԷl oc Jesu im Pilat Էc'any af

Matie 27.12, 1114; Luk 23.15; Jan 18.2838

1 Ibribr fafa Էm a, *egb waw Եsel Էgbel a, *agյ ԷkբԷկ a, ol e *low yeցm Եsel a, lel agյ a ԲԷյ Էk'el Էl e *Sanedրen Էc'agյ a, Եc ok usu nyam eke ki bebմ low a ucu Եs. N'Ծյ wԷl Ծny Jesu awյ Էտյ l'oc n'im n'Ծյ ow *Pilat.

2 Pilat Էbrմ Jesu nine: «Կ՞ րյ Jwifel Էc'Էb Էbu ԷԷ?» Jesu Ծdu Էb nine: «Իյ obi dad.»

3 Էgb waw Եsel Էgbel a am dad Ծw Էրյյ ռ՞ռ՞ ok Jesu af.

4 Ow Ծյ ԷմԵny Pilat am Էbrմ Jesu Եse: «Կ՞ րյ Ծtum dadմ low kaka ԷԷ? Էտյ կ՞ am iri Ծw amua ԲԷյ eke n'am dad l'ok'րյ af ԷԷ?»

5 Կ՞ Jesu dadմ low kaka Էյ, Էտյ ow e low iti Pilat any afրն Եs.

WԷl Ծb Jesu low luw Էci

Matie 27.1526; Luk 23.1325; Jan 18.3919.16

6 Eke sakp sakp ԲԷյ *Pak Էc'Եs gbԷgbl e lԷրյ b'ow a, *Pilat b'Էlu sobel Էm Եs nyam eke dedeku a b'brմ ab Եs.

7 Կ՞ Էրյ nyam eke wԷl b'Երյ Barabas lele lawlel ab ab Էk'Էցրմ Rom Էc'Եs Էw e low Էbrմ a, anյ sobel Էm. L'el agյ Էk'el Էc'Էrm bebl Էm ibi Էրյ.

8 Dedeku a uyu im Էրն Pilat, Էտյ am Էbrմ'n Եse: «Կ՞k low a eke lakpo lakpo ԲԷյ bi kok a Ծյ Էյ.»

9 Pilat Էwl am Էbrմ Էl Եse: «Կ՞ am Էrurir eke mi k'Էlu Jwifel Էc'Էb Էbu ab Եs m'Ծյ Ծny ԷԷ?»

10 Tasi Էm a, l'uw any eke nyamn Էyr Էm *egb waw Եsel Էgbel a oc Jesu is'r.

11 Էgb waw Եsel Էgbel a am ok dedeku a al Էm dad Էk'ow k'Էlu Barabas Եs Ծյ Էl.

12 Pilat ԷմԵny am Էbrմ dedeku a Եse: «Sica bla lowi mi ki kok Էրյ a eke b'Երն Jwifel Էc'Էb Էbu ab ԷԷ?»

13 N'am Ծր li dad ow l'Եse: «՝Էw'r oliկյ af!»

14 Pilat Էbrմ Էl nine: «Կ՞ bla low Ծbr Էյ li kok ԷԷ?» Կ՞ n'am Ծր lebl tuԾtuԾ Էm l'Եse: «՝Էw'r oliկյ af!»

15 Pilat Էrur eke ki kok dedeku a sos Էm Էրն; na sosisem l'Էlu Barabas Եs n'Ծյ wԷl, Էտյ n'Ծյ wԷl Ծr Jesu say Էm gbuյ Էտյ l'Էlu abusu Եs eke wԷl k'oc im Էw ow oliկյ af.

Sր՞Ծա Էրյ a am kokr Jesu miyer

Matie 27.2731; Jan 19.23

16 Srɔda eyɲ a ɔny Jesu elu lakp lokm a ek'el *Pilat e gbugɲ a, etɲ l'esɲ el lawlel likpr a fɛɲ ow.
 17 Li sus ow mob sus em ebl kondonɲ nyam, li kok mirɲ em tufe etɲ l'oc l'us ow.
 18 Etɲ n'am kokr ow miyer l'ibrm ow l'ese: «S'am esɲn'ɲ o, Jwifel ec'eb ebu!»
 19 L'oc likɲni n'am ɔr ow nuɲ nuɲ, n'am fafl ow sar any, etɲ n'am kok nyandre l'ok ɔwrɔkp wus ow ec'any af.
 20 Eke li kokar ow miyer bake ow uwr a, n'ɔny mob sus em ebl kondonɲ a l'oc ow es, etɲ l'ewl meny l'ot ow e mob tasi a li sus ow. Etɲ sica n'ɔny l'elu ow gbeɲ n'am oc n'im l'ew ow olikɲ af.

Jesu ec'olikh af ew owi

Matie 27.3244; Luk 23.2643; Jan 19.1727

21 Sica eke n'anɲɲ ejagb af n'aam a, l'ɔbr Simɔ, Siren baɲɲ iy nyam ek'el Alesandr lele Rufus ab ec'el es ek'anɲ akp em am ow, etɲ srɔda eyɲ a ɔny'n l'ec em eke li k'abum Jesu olikɲ.
 22 N'ɔny Jesu n'im usu nyam eke wel b'esɲ Gɔlgota ek'el nyandre em «Nuɲ kpɔk ec'usu».
 23 Yogɲ srɔda eyɲ a wuwlm mar lele *kpey ab ɔɲ Jesu eke k'egɲ, kɔ l'egɲm l'ebm.
 24 L'ew Jesu olikɲ af etɲ *li cec ow eci mob sus em a sɔsum oc kok em*, l'uw egɲ egɲ ec'ek'ebm ab any.
 25 Ibribr e wanci libarm af anake l'ewr ow olikɲ af a.
 26 Etɲ ligɔg log nyam eke wɛl nɔn aru in ec'olikh a, am yegm low a nuɲ af eke wɛl ɔb'r low luw ec'a. Odad a el: «Egɲ na el Jwifel ec'eb ebu.»
 27 Yogɲ cɛ l'ok ów eɲuɲ kok esɛl yony yeji olikɲ af; nyam anɲ Jesu lidr abu af, etɲ nyam anɲ'n nɛmn abu af. [
 28 Nene anake Nyam Lel ec'a e dad a iy neny a: *Wel awl'l ów eɲuɲ kok esɛl ec'araɲn.*]

29 Agɲ ek'am ecr yogɲ ec'a, *am egɲn nuɲ em wɛwr'r* etɲ am dad'r ese: «ɲ ek'am erur eke k'ufɲ *Nyamel ab es ke seɲɲ nyahan kpɛɲ ús ejec'a,
 30 èbr ɲ sosi, ànɲ olikɲ af yogɲ us es!»
 31 Etɲ *egb waw esɛl egbɛl a, lel ol e *low yegm esɛl ab ab yeji am kokr'r miyer dadarir el ɔfr em ese: «L'eb agɲ ejeci l'elu es, etɲ l'ótum eke li k'ebr in sosi!»
 32 Ke *Mesi ikɲ na ek'el Israel ec'eb ebu a, ànɲ olikɲ af aɲa us es, ke s'ékn, ke s'úb'r nawre tasi.» Etɲ ów eɲuɲ kok esɛl eke wɛl ew olikɲ af in ab a yeji am wɛwr'r.

Jesu e luw a

Matie 27.4556; Luk 23.4449; Jan 19.2830

33 Sica legɲ uyu nuɲ em a, ncebn ey wus a nimum af toɲ ok ncebles e wanci nyahan em.
 34 Ncebles e wanci nyahan em a, Jesu barm lebl tuɔtuɔ em nine: «*Eloi, Eloi, lama sabaktani?*» (ek'el nyandre em: «Em e Nyam, em e Nyam, kɔ bla etɲ digɲ elu'm es ee?»)
 35 Agɲ nyam nyam ek'anɲ yogɲ a iri odad na etɲ dad nine: «Ìrir, n'am esɲ Eli!»
 36 Etɲ el em ec'egɲ nyam uru es im oc mbra usm el eci mar ab em, oc ujr likɲni nyam em etɲ oc am ɔkɲ Jesu ek'egɲ. Etɲ li dad nine: «S'éwr nyamn es s'ekan ek'Eli b'ow ɔny usm'n es olikɲ na af!»
 37 Etɲ eke Jesu barm lebl ligbɛl nyam a, l'ok sel es.
 38 Wanci ab af cɛ *Nyamel ab em eci gbad gbɛl gbada a eke wɛl ew eɔɲɲ *usu lala ab any a, igɲ afr em a etɲ agbr em araɲn didi toɲ ok esr em a.
 39 Rom e srɔda eyɲ a eci anym es a ek'ɔbr Jesu any a, ekn luw a ec'elel eke ecr etɲ li dad nine: «Nje tasi egɲ na Nyam ec'Iy!»

9 Eke sica Jesu igb luw em a, nenegh e legh krekre a eci ibribr fafa a, l'ikj anym li yegm Mari, Magdala yowi a ek'ow em l'ogh *abh enj l'ogh a sos.

10 Kpekj Mari im enj *jam esel likpr a ek'anj sos es ow em ke am ikj enj a, etj li dad wel low a feh eke l'ekn a.

11 Li dad agj a nine: «Jesu anj ovr, m'ekn'n!» Kò eke l'irir odad na a, l'ubm ow nawre.

12 Ow e jam a, Jesu elu sos okm akunda ejec'em, yegm jam esel yony ek'us ejagb aam kpukpu em a.

13 L'ewl meny l'ow, etj l'otar ow e low akr l'ok jam esel likpr a, kò el yeji wel ubm el nawre.

Jesu elu sos okm yegm jam esel lew nyam a

Matie 28.1620; Luk 24.3653; Jan 20.1923; Ob Kok 1.611

14 Sica eke *jam esel lew nyam a am ij ob a, Jesu elu sos okm yegm el; etj n'am enym wel abr el ec'omn eke n'onym a lele el ec'erm tuutu ab ab sosiem, anke wel eggh ubm agj a ek'ekn in ec'owr anj a e low a nawre.

15 Etj li dad wel nine: «Imn wus na nimum af ke óbr Amani Mamn a e kokoba okr agj feh.

16 Egh yec'eke b'ow ony omn ke wel b'ow ok mij nuj a, li b'ow n'enj sel; gbeko egh yec'eke k'ow onym omn a, Nyam b'ow ob'r low luw eci.

17 Agj a eke b'ow ony omn a, kin meny ewr eke b'ow ok okm: li b'ow l'ogh abj enj em e nin em; li b'ow l'obr sebr ejeci;

18 eke n'onny lorjn abu em, etj l'egh ob kaka feh eke wel ok ob njj em yeji, ow k'ow kokm el low kaka; li b'ow l'at ólu abu nuj etj wel b'ow ewl.»

19 Sica eke Es Kòkò Jesu dad el odad bake ow uwr a, n'im afr etj li sig es Nyam e lidr abu af.

20 Jam esel a im etj am ob Amani Mamn a e kokoba susu a feh. Es Kòkò am elum el abu el e juma kok ab em, etj meny ewr feh eke n'am elu okm a, am yegm ek'el ec'odad a el nawre tasi.]